



遵巖先生文集卷之六

五言律詩

送陳學顏辭親應舉

却歛黃香扇行穿季子裘書將隨計吏富且謁諸  
侯舍館鳴鷄夢關山叫狔愁明珠光照乘莫向暗  
中求

送謝生詵辭親應舉

閩楚千餘里歸呈草色通鄉人推射策巖父教移  
忠問絹親闈裏題詩客路中漢庭方愛少去作一



終童

送陳邑博子秀才辭親還家成婚

成器專攻玉傳經勝遺金日辭鱸館愛春動屏雀  
心執鴈將修贄求凰或弄琴遙知扇枕戀情不滯  
鴛衾

春雨東徐山人客居

春風忽已滿客子亦何心雨長薪芻價泥荒車馬  
音聞堦侵草遍濕突起烟沉更有關情樹窻前滴  
夜深

丘少泉臥病山中作詩見貽用韻奉答兼  
以候之

憐君臥病久枕上過芳春山色翻欺瘦鶯聲總喚  
嗔鴉占休臆對蛇壁易迷真學取無生理心中滅  
盡塵

送李一泉往惠州推官

懷牒持三尺分麾佐百城溪山輕瘴癘風氣就開  
明石埭由來美豐湖自昔清龍川經過處一弔尉  
佗營

挽故石埭尹尤先生

彭澤居官放黜婁謝士貧松筠方傲晚草露忽輕  
晨喬曷長飛去潘花永不春祇餘琴調在空閑匣  
中塵

東程郡侯臥病 二首

求瘼何其急起居翻失常言多詢利病心苦犯溫  
涼暑牘將方檢尋醫與吏妨元元資臥理此地卽  
淮陽

交戰知曾勝胡爲薺疾嬰違心牽赤綬勞已救蒼

生舍晚榕陰暗樓昏蜃氣明抱痾因閉閣一使訟  
風清

送黃南池

歡遊不覺久相送忽成悲嶺外少來往年畏別  
離更無叅玄理誰復賞新詩千里看明月應懸兩  
地思

送李拙修歸鄱陽 二首

拂衣從此去歸興一爲談藥譜新將著農書舊所  
諳酬言持手塵晞髮廢頭簪相訪欲知處應之柳

市南

道氣如君盛心期與我談妻孥能共隱鷄犬亦相

諳木榻坐

皮冠削竹簪蠡湖烟水滿更向蠡

湖南

唐婁江明府邀遊九日山同黃竹溪東石

二公 四首

夫君善為政自鮮簿書情張幕人皆覩傳杯吏亦  
清花衝壺矢落雲逐舄絢生造次成遊賞應留此  
地名

最有登臨賞兼之賢達俱落英粧籍草鳴鳥勸提  
壺古寺藏林表輕霞暎海隅青春垂欲暮莫遣興  
情孤

簪為襟期盍樽因名勝携葦烟陰白石花水漲清  
溪佳卉當春發嬌鶯近酒啼如何更辭飲斜景竹  
林西

處室何其迫坐為城郭拘稍看山色遍頓使俗情  
無此地寧須買今茆即可誅且將狎鷗意暫爾伴  
飛鳧

遊五老峯 四首

卽有眈奇癖登山好問源不辭千嶂迥獨訪一峯  
尊飄袖連飛鳥攀蘿學掛猿纍纍岡阜起坐閱盡  
兒孫

悠然獨抱此含意在乾坤陟險消多病尋真契寡  
言桂叢冬亦茂石室午方暎倚杖神凝處泉聲樹  
裏喧

茲山尤物衆一一愜遊盤芝可充飢茹蒲堪結坐  
團題詩生葉大濯足有泉寒由來吾所愛欲道與

人難

歎息煩囂久幸然未白頭靈藥非難得名仙或可  
求金光叢裏映玉乳石中流回首顧妻子真堪敝  
屣儔

別業雜詩 四首

小築無餘地大觀別有天窻中含遠岫屋上嚮流  
泉高咏時題葉閒情偶弄絃興來何不可寧復惹  
牽纏

山人向客歎此地日如年不悟幽閒永翻疑晷刻

偏蕭條機事淺澹泊谷神全始信樵山頂爛柯非  
忘傳

旭日照春山山春物色妍鳥聲多在竹花氣欲成  
烟薜長新修路池深舊引泉佳時將靜處人意自  
悠然

孰知遺世念不在去人家徑任青苔占堦從碧草  
賒朝朝娛覽詠物物稱幽遐莫恠迷秦姓春來桃  
已華

訪友人山房留題

恠爾沉寘甚時常出入稀以茲廬可愛肯使願空  
違隱几鳥啼急披襟風到微營營予亦厭將此共  
局扉

病中漫述 二首

一生十九病坐使廢居諸日日求醫術朝朝理藥  
書家人憂卽死朋友恠何踈世情真已矣吾道竟  
焉如

頗得病中趣未嘗苦不堪床頭看卷熟被上作書  
耽交息寧須請禪忘忽已叅何日稍能起門生擬

昇籃

病中柬可泉與可泉別久極思一見而病  
不能往情見乎詞

未由披宿霧空此挹高風病意翻增劇交盟始信  
窮世情經歷後心事寂寥中知爾欲相見而今只  
一翁

可泉相訪病不能見

爾來歡晤少伏枕過馳駒有客方銜使多情顧病  
夫柴關非固閉藜杖自難扶坐席何曾割終然出

處殊

友人下第還家

西上又空返悲歌易水曛有司輕失士無路達明  
君莫歎家如磬還看鬢似雲南山當日霧猶可養  
奇文

病中李君度見訪家僮絕不爲通走筆柬  
之

閉關非爲疾性本好沉冥論學刊中說修形正內  
經訣從靜者悟語忌俗人聽已戒應門畢君方來

叩扃

章三洲以侍御謫推興化府敘復揚州郡

丞 二首

維揚風物好不比漢長沙半刺官雖冗量移渥已  
遐娥眉空賈妬白璧本無瑕好取原冠拂朝中待  
觸邪

敘遷猶佐郡恠爾意能安祇有簿書急誰當禮數  
寬高才宜見屈枉道亦何難雨露清時澤無爲薄  
一官

送宋仲石赴召 二首

洛陽橋外路萬里指長安舄向天中去琴留海上  
彈龜文頻撫劍羊角欲生冠相送情無已寧因感  
遺肝

國興知有象君去莫傷違已設諫臣賞因徵良吏  
歸九閭非虎守五位見龍飛美錦今成製還堪補  
帝衣

遊清源山 二首

取路非高足入山力復餘所長元有適於計未爲

踈高見羣生擾閒看四體虛堪嗟二畝半促促邑  
中居

城中長日望翹首起遊思如何咫尺地動以歲年  
期忽覩草花喜終遭猿鳥疑明歸應後望惆悵使  
顏衰

清源山紫澤宮

畏景在城市聊茲息茂陰攀躋不覺遠依止自知  
深石上消氛氣鍾前起悟心宿非如可謝卜筮請  
從今

上洞宴集 二首

千峯最高頂上客敞芳筵心豁雲初散形忘酒易  
傳滄溟侔洞達城郭俯紛闐一與豪賢飲條然病  
已捐

憑高張讌好嵐翠滿軒楹杯泛流霞氣絃含漱玉  
聲竟消遊目遠日入發談清情深寧在酒不醉自  
非情

清源山獨行諸峯不同遊諸子 二首

洞壑杳氛氲中間紫翠分興來祇自得獨往有誰

羣激射風前瀑孤高天際雲心賞悠然會何由與  
客論

人世多浮變高山自蒼然因茲修杖屨暫得解微  
纏白石無塵滓青松有歲年每逢偏逗歷佳處正  
難傳

遊清源山同洪芳洲 二首

曰余懷素志將子有知音卽茲山與水何必絃鳴  
琴捫葛亦同幹酌泉時共斟無言徒脉脉相偶意  
彌深

同病本相憐遊携接勝緣短邛迤間執兩屐對分  
穿逢石呼俱坐探經覽共研不知形已黜目擊兩  
茫然

園廬閒興

積雨端居暇翛然愛一園菊如陶徑茂瓜比邵畦  
繁暑退風歸樹秋深潦壞垣城中少閒客誰復到  
吾門

題黃墩書屋贈陳玩潮 四首

踈林半畝分自築一經堂衣典充書購帷垂任圍

遺巖文集 卷之六  
荒諸生來卒業千里有持糧取適絃歌暇尤難忌  
歲芳

之子鶴鳴意行唵祇在陰四山低戶入一徑隱花  
深蟲響長依砌鶴飛知返林一聽希瑟調自見卜

居心

微溪日自行蓬藿也難生不受故人薦欲成處士  
名環堦無惡草幽鳥有佳聲過爾輒難仕貪茲養  
道情

習懶非吾性胡爲常閉門本嫌塵世事獨好古人  
言窓暗螢來照庭風葉自翻壯年在明世慎莫苦  
辭喧

蔡東洛夜坐

共坐高齋夜蕭然息衆喧月中星盡隱竹下露偏  
繁久厭時人語今逢長者言非因憐夙好何自顧  
柴門

和岱麓通守秋夕有感之作

高才嬰世網懷抱曠難儔少輒簿書暇還悲時序  
秋朱絃徒自撫綠竿有誰留操觚娛永夕心跡見

悠悠

和胡雙華郡丞郡齋言懷見貽之作 二

首

爲郡多詩興高人繼謝公民和官府簡花落訟庭  
空暮閣侵簷雨間床掩帙風此時鳴鶴意自與在  
陰同

何事專城貴偏多懷土心題詩常對吏寄興在抽  
簪長物看青組幽期覽素琴愧持巴里曲欲緩越  
人嗔

郡侯方西川與錢塘縉上人雨中郡齋夜

談走筆奉柬 二首

政理日清淨郡居類化成雲峯簾外變雨氣署前  
生浙瀝琴書潤蕭條几簞清夜深懸溜急法辯自  
同傾

不爲學無生心閒物自平高僧輕遠至好雨正時  
行雲起兼慈色水流帶覺聲始知符竹貴元有錫  
緇情

和吳通守夜月思鄉之作

海邦亦共月何事憶荆扉偶見如環景能堪碎壁  
輝羈心因自感高詠覺聲希莫自思鄉切還看承  
詔歸

聞縉上人遊清源山

高僧真避俗爲客也耽山路向樵人得身同錫杖  
閒泉源當夏冽蘚色閱年班遙憶孤燈影留光萬  
壑間

病中柬縉上人 二首

夏日多榮木凋傷感我生拘拘徒自笑炯炯欲何

營已覺芝苓誤無由羽翰成三尸如可僇願假伏  
魔兵

伏枕不知久庭柯綠已蒼以茲時序感頓覺圃農  
荒養性資琴瑟達生覽列莊今將未死骨齋沐付  
醫王

送唐南安赴召 二首

帝心嘉勞來戶口不虛增負展方思治璽書遂見  
徵簡求青瑣入意氣皂囊勝莫倚鸞鳳志今當作  
鸞鷹

吏民看解印未去已堪思魚棄皆長尾花繁故映  
枝攀途車屢滯出邸橐空垂欲佐薰絃曲一琴行  
復隨

周石崖督學擢廣西叅知寄此送之 二

首

在楚卿才盛如公更絕倫雲夢胸自有岫嶠氣常  
親陶鑄看多士綏懷託遠人九嶷遺跡古一爲訪  
虞巡

道術陳良是丘墳倚相親章縫探粵室文物起來  
塵變豹方成蔚靈蛇盡握珎還將今禮樂往靖桂  
嶷人

元日訪青門月臺寺寓處坐談竟日

無事緣長病似君在客邊椒花休頌酒栢樹共談  
禪歲律風微覺人天語自玄香聞應有悟景旻未  
言旋

元夕柬青門

星宿爛山城人家正競燈微霜資照燭皓月見侵  
凌遇節心猶勝追懽病不能問君今夕興還似少

年曾

十六夜與青門談

四面歌鐘起華燈燦月光  
柳梅微辨曲桃李宵疑  
粧誰向家中坐爭看陌上狂  
獨餘吾與爾相對在  
僧房

青門臥病走筆奉柬 二首

一戶閉香林高人此定心  
夜深童子睡庭際草蟲  
吟蓮界除腥氣珠光照瑩襟  
他人徒問疾吾識爾  
陸沉

獨宿青蓮子昏魔胡未降  
伏床迷界色稽首禮幡  
幢冥力瞻燈影殊香到藥  
缸冷然醒睡頃微月在  
前窻

青門將歸走筆奉留青門寓學上人精舍  
而與郡侯友也故詩援上人與郡侯以  
留行 二首

如何好遊者歸興起秋風  
言踴初來籬欲隨東去  
鴻林居方得伴賓館遽愁空  
且伏狙猿性相從事  
遠公

縱有思尊興能忘伐木情垂簾常整暇下榻自高  
清茉莉花初放荔支實漸成少須知臭味歸詫里  
人評

雨中柬青門

層城晦風雨穹宇迷昏朝陰翳方驕恣市塵乍沈  
寥九衢橫潦溢千樹墮芳飄勞想伊人阻真如隔  
水遙

送青門 二首

惆悵溫陵酒與君不再持高情隨地勝孤跡閉門

思落日人方遠芳郊意自持從茲三徑社吾亦懶  
唵詩

林下非無客新詞誰與吟一朝風袂解千里暮雲  
深猿鳥娛征路荒茅掩故林殷勤題贈句聊欲比  
兼金

題徐氏溪亭 四首

高亭虛出水結構若天成波蕩垂簾影窻留過艣  
聲樹低看岸遠風細覺潮平自有芳洲杜舍茲日  
日生

滄水日悠悠虛亭壓水頭棹歌喧極浦峯翠漾中  
流每夜偏多月長天只似秋更添幽事併繫柳木  
蘭舟

飛鳥點青天驚魚跳錦川簷欄相照映空水共澄  
鮮草際分臬陸烟中辨舸船有亭佳如此真覺主  
人賢

善占風物勝心巧更多奇軒楹翻別製溪壑發幽  
姿眺迥開窻小臨清累石危城中池館盛坐使廢  
招隨

題張封君南圃池亭 四首

卜築初掄地謀權不計錢嵌巖驅到石漲沼引來  
泉花氣長薰酒禽聲每度絃溫陵風日好更向此  
中偏

別業借恩光臺池草木香玳梁棲燕子錦石戲鴛  
鴦荷密魚難聚花繁鳥易藏如何堪比勝金谷在  
河陽

人寰開徑遠平地覆山危薜荔綠青壁芙蓉冒綠  
池嵐烟縈几席波影蕩簾帷更有封君樂千頭橘

樹知

愛茲城郭內丘壑趣留人曲徑泉流遍孤峯雨洗  
新藜篁寧受暑衆卉自知春好客常開宴高軒來  
往頻

送滕生還吳滕乃葉郡推之客

不辭爲客久所戀主人賢郡閣同疏食歸囊倒俸  
錢嶺猿推去馬江月照鳴舷自說慙干謁家原有  
薄田

挽楊翁

已傳不死訣竟返無何鄉邦人來赴哭隱者果云  
亡乍見堂帷設應無隣杵相練精成鶴化千歲一  
歸翔

挽黃母

三十未亡人能甘集蓼辛歸逢地下面不愧嫁時  
身閣閉窺帷月梁餘點鏡塵栝捲諸子廢口澤自  
如新

挽貞惠王母許氏

罔極嗟令婦斯人獨可欽茹荼明苦節對月比貞

心養有潛移水生無強委禽堪悲川逝底別劍復相尋

挽陳子貞秀才 二首

子淵稱短命汝復弗如回庭對曾聞禮公車未召才芳蘭翻自蕪玉樹易先摧堪悲垂白父老有鄧攸哀

皇天聞與善之子命何艱種苗徒見秀覆篲不成山賦鵬棲門外書螢戀案間遙知爲蝶樂夢去竟忘還

哭蔡從祖秀才

早歲承家學新文冠士流河東未獻賦地下忽長遊慈父傷蘭樹佳人詠栢舟千金聞買駿縱死也應收

挽周蹟山周以諫杖死 四首

萬事真長已孤生敢自私批鱗當逆處收肉在寒時復衣仍赭服正寢託丹墀片玉今埋矣無因諫用尸

牽裾難動聽攀檻竟徂生信是百年速須知一死

滄海集卷之六  
榮雨揮行路涕風慘挽夫聲莫作逝川歎能留不  
泯名

玉碎姿猶潔蘭摧性亦芳歸根辭雨露埋質罷珪  
璋車飾看如柳山形見若堂只愁餘憤瀝燕地死  
飛霜

降鬼茲鄉返精蒐何所依芻靈疑榜吏幽城訝園  
扉白日終無照青春更不歸天心垂涕泣寒雨載  
途飛

陸檢校歸襯作此送之陸揚州人

只說宦遊好寧知客死哀衣重官長祿木美邑氓  
材山迥銘旌遶天長細雨來揚州生樂處今作鶴  
飛迴

挽侍御粘滌樓公

介節如絃直貞心比栢蔥觸邪冠掛早諫獵草焚  
空几篋無長物田廬有素風至今漢庭上猶說避  
花驄

挽王僉事 二首

防江千里險露冕百城開惠澤洪流遠狂瀾勁節

迴世情方忌直天道亦妨才湖雨紛紛送荆人挽  
些哀

近日看流輩似君操行稀守官遭吏議久宦有兒  
饑處室無長物附身惟故衣生平違握手沒後涕  
偏揮

楊蓮渠先生移居

長貧易徙家蓬轉類生涯隣壁燈堪借市帘酒好  
賒捲簾携舊月帶石走孤花奧室知難入非關隔  
絳紗

挽徐宜人

桃葉宜之子瓠犀詠碩人已無蕢實在空有褰衣  
新寶鑑誰臨匣羅巾自掩塵夫賢兼子肖入地也  
含嘔

送杜松江先生之岷州肅藩教授

不識岷州遠千峯費馬蹄濫觴江水小分首隴山  
低雪含盤古始路盡坎方倪王門裾曳樂應忘在  
天西

挽許三浦

運慶文集 卷之六  
辛苦三冬足奄驚萬事非窮途山子蹶斗暗莫耶  
飛返鬼茲鄉降游竟何處歸心悲廣陵散無復鼓  
瑤徽

挽蔡司成夫人丁氏 二首

桃葉宜家日標梅育子時問來貯雜佩佐學喻機  
絲扇掩月臨匣衣藏風舉帷蘋蘩今罷采空復澗  
濱滋

借老願嗟違茲辰遂並歸劍從泉底合燈向地中  
輝山雨沾容翼江霞變闕衣如雲車馬從其奈昔  
時非

送蔡東洛赴銓改官 二首

寒氣驚嘶馬離人起戒晨清霜沾勁草脩坂滅流  
塵爲吏儒衣舊謝官行李貧長安留滯處當路欲  
何因

不耽數斗米高意似淵明來往都乘化榮枯豈吝  
情雨中孤棹去膝上一琴橫舉世知音少希絃何  
用聲

送朱肖簡

分得寸銅印新從片玉科平生優禮樂此去定絃  
歌嶺驛出門遠江帆破浪過縣人流散處還集日  
將多

送比部史應之使還入京史以使事便道  
過家長子娶婦而太夫人褒封之典亦

適至 二首

榮宦值明時光華併遂私勞王欣有暇醮子慶多  
儀使節驚隣里天書寵侍慈一心知報主還闕自  
難遲

想見燕京路秋風隨馬歸朝端須奏復即位待光  
輝入省名應盛趨班影乍稀鄙夫何所慕之子振  
音徽

送龍南岡之貴州兵備僉事 二首

欲識宦遊壯須知王土遐鬼方曾伐國人跡比趨  
家梯路通酋賚刀耕履籍畚朝駟開苻盛今日未  
須誇

繡斧乘朱輪要荒識使臣火雲千箐日花瘴四時  
春蠻語譯難曉夷心義可馴簡刑兼靜武坐使遠

人淳

送王堦齋守贛州 二首

兩水流成贛圖經記郡名分符君出守共理帝憂  
氓好古今當用酬知在此行佩牛應賣盡駟向甫  
旧耕

露冕何其貴安車朱兩轡凋殘方待救命數豈徒  
尊偃草知風尚烹魚悟政煩君心已如此相別更  
何言

寄贈 侍御按嶺南 二首

繡斧下青冥共瞻執法星照人懸藻鏡游刃發新  
鋤令捷風行草威疑蟄震霆炎荒千載地一旦洗  
氛腥

百粵叅殊俗六條握漢綱驄行真到海猿叫亦驚  
霜吏有捐黃綬人皆識皂囊仍聞攬轡暇搦管擅  
詞場

壽陳西軒令尹

百事不關身一心專養神看書多得意中酒是全  
真陰德覘眉采壽徵卜耳輪門前五楊柳長閱歲

華新

聞家兄途中得疾

平日親庭側未曾曉出門如何遠游興不記垂堂  
言藥物應難得醫方孰可論祇將愁與愧送目望  
賢昆

遠道傳安否難知消息真思深翻惹惑望極轉傷  
神訪市將求卜行途屢問人莫言憂畏甚手足是  
天親

莆陽龔生名應龍號潛于

神龍神不測勿用爲時屯沕穆形難偶深潛德可  
論知機猶戶坯好遯是泥蟠問易將因爾又忘得  
象言

遵巖先生文集卷之六

遵巖先生文集卷之七

五言排律

聖誕前期一日寓直客部同屠儀制郎中  
詩以柬之

瑞氣滿南宮星河渺渺空千廬翊警衛萬國奉朝  
宗蹕路風先淨帷張月自通祥雲當極北曜宿及  
霄中謬籍叨分直仙郎嘉自公何其頻視夜彼美  
切循躬秉燭晤言久焚香宴坐同岡陵徒欲祝巴  
里愧難工何人嗣周雅待爾振王風

屠郎中儀部署館新成賦題九韻

仙吏日攸寧華館肅虛清地是君王賜材兼將作  
營象維扶棟宇納景敞軒楹北斗掛簷迥西山對  
坐明迎秋朱火變當晝白雲生爲沼滋魚藻䟽畦  
長鹿萃唯寅皇振采多暇鳥求聲琴與商歌合詩  
將起草成何言堪野獲蘭省待嘉名

伯氏曾漸溪先生奉使 冊靖江王敬上

四十四韻

漢將標南紀周王暨外埏黃支開象郡赤社直牛

纏灘水扶桑表鬱林滄海邊霜清八桂瘴嵐結九  
疑烟立壁攢青蓋飛峯削紫蓮伏波盤荔峽羅閣  
瞰梧川光色美如此珍奇產固然軌苞輸御府貢  
筐達郊鄜經野襟交廣肇封俯柳全授圭羅赭組  
分土胙炎天玉葉枝璀璨銀潢派接連維城宗子  
令開國大君專帶礪河山固金湯磐石堅瞻依一  
萬里屏翰二百年惇族紆宸眷建侯展睿權文閭  
簇仗啓廣樂鼓鏞闐貝闕丹霞裊銅樓霽景鮮冠  
裳趨濟濟纓玳萃翺翺節捧星辰上制傳象緯前

瑤函藏寶冊金橫闕琳編翠琯祥雲抱紫泥卿日  
懸皇華十道出司諫一身遷螭筆暫須輟龍顏夢  
尚牽蘭坳張祖晏桐柱奏離絃雪送燕關騎春催  
楚蠡船異花紛拂纜怪鳥噦迎旃廬霍行堪結巫  
衡覽更便槎搖弱水影旌颺閭風顛列峒密猩語  
諸蠻解漢言罔巒眺邈邈原薄驟駢駢篁竹啼猿  
合石楠躡獮綠輶軒駢入境劍舄忽登仙聖主威  
光近明王禮數虔遐荒憲命播藩域寵靈宣晝向  
日邊接昏從花下旋墀迎珠躡履裾曳珮平氈淮  
國讌游洽梁園祠藻傳觀風行問俗訪古重懷賢  
帝王蒼梧些湘妃澧浦篇堯山澆桂酒舜廟擷芳  
筌逢鶴還珠洞尋砂勾漏泉豈云奔命遠宜是勝  
遊偏謝客吟應遍仲宣賦可鐫茫茫五嶺外何日  
使星還

上外祖李竹坡先生致尚寶政二十四韻

國運開貞泰 今王禮舊耆頒旌招野伏驚代拓  
巖姿邦俊推公望朝章屬令儀丘樊馳束帛海嶠  
動綸絲玉署初移寵金扉後命貽西垣瞻日殿內

闕切雲司雨露青冥潤弁纓象緯疑祗言翔岳驚  
詎意曳塗龜道大輕狗祿幾先果避時竟忘魏闕  
眷不廢考槃詞臨組惟三揖封章懇一辭皇心揆  
赤悃溫詔下彤墀計決群賢早名高一代垂滄波  
薄赤紱黃髮狎青鷺棲谷情自得還 跡信追直  
嗤少室出誰賦北山移葛戶琴書暇筠莊歲月遲  
江天䟽遠目花鳥怯新詩傲世南陽蠖尋仙綺里  
芝瑤蘭湘畹紉玉樹謝庭枝峻節元齊杜養真亦  
尋雌登龍漢士慕歌鳳楚狂悲尚想篇翰接終虛  
几杖隨因風敷此曲遙望碧雲涯

天津覽海

登高以望遠窮髮此天池混漾迷三島鴻蒙辨四  
維浮波極地際蕩景眇雲涯日月懸孤嶼江河灌  
漏卮直將天作畔聊取漢爲湄恨鳥啣枝沒搏鵬  
踢翅垂乘桴傷孔志摛賦慕班詞衆水朝宗去何  
時一似之

舟中

行路難如此嗟子何滯違朝征沙鴈引晚泊渚鳧

遵廣文集 卷之七  
依席勢乘風駛棹謳擊汰飛濟深楊桂柹厲險戒  
柳衣冑止葭侵露綠崖柳礙暉波文明夕照水色  
長寒威遠火看還滅孤烟迫已微勞歌徒自奏惆  
悵未言歸

發東昌道中寄酬寇太守

舟行聊騁望天宇曠微微河曲回隄勢川明泳日  
暉通波連井邑平壤畫封圻亭臯千里衍墟市百  
家稀玉堰龍蛇蟄金郊草木腓獵騎呼鷹去漁簑  
罷釣歸夷猶雖有適徙倚欲何依山嵬瞻岱近天  
遠望畿非稟訓亨重坎悼心未息機故人相念者  
為見斷蓬飛

始至留都戶部作

謫籍復收掄天心為洗冤榮枯元有分憂喜自何  
門器小乖通理才微誤再論未能思舊過轉使愧  
新恩秩叢堪安拙官貧足避喧不知都邑異覺省  
闈尊質是砮慙玉班非鷺接鴈鴻棲猶得桶羊觸  
戒臨藩薪積宜先賤舌柔悟後存為看桃李下成  
徑亦無言

戶部攝篆作

握蘭叨入省愧此大夫紳周時官主地漢室署名  
民已是爲郎久翻疑從事新掌邦三壤賦奏計四  
方人無術疏泉布何能學算緡迂踈下吏怪懶慢  
上官嗔治牘難稱敏趨期常苦頻非關王事急祇  
是早閒身

戶部寓直作

涼月靜高松華扉掩幾重沈冥遺吏道恬曠絕人  
蹤宴坐時聞桂行吟暗度蛩漏聲風易斷山翠露  
偏濃襍被同今宿舍香異昔逢羈違雲臥性病損  
世交容擇木難如鳥潛泥不是龍千門分曙裏猶  
記聽朝鐘

題雙橋別業爲倪考功大夫賦

石橋人不到雲水自爲家峯勢低窓入溪流向峽  
斜田園三戶闢草木四時華拂席殘雲戀垂帷白  
日賒穴開成鳳羽畹藝茁蘭芽振鷺天庭後鷗飛  
多少耶

送項膳部遷之出守臨川

翩翩五馬貴盡頌用賢宜辭省蘭俱遠之官鶴與  
隨行春時擁馭坐嘯晝垂帷山遶右軍宅天清內  
史池名將先輩掩政起後人思他日徵良吏看君  
第一碑

寄贈李邦良應聘修兩浙志

霸王開列國牛女直揚州興廢傷千古人文著九  
流高才宜可作衆體莫能讐赫矣雄圖地居然載  
筆遊賚詞無下士館穀有諸侯跡訪虞巡始書從  
越絕修勞思應夙夜託志在春秋成將藏禹穴待

取好書求

閒居

寂寞棲窮巷蕭條獨揜門機忘親散帙交息絕華  
軒隱几非遵孟閒居已勝潘幽蘭充士佩好鳥與  
人言有飯時食菊無憂不爲萱陸沉同蠖屈泥辱  
異龍蟠倦禽知反宿落葉豈歸根懶拙從吾好惟  
思守故園

閒居對雨作

閉門亦已靜零雨益淒清映牖增寒色鳴除急暮

聲亂雲時聚散淺溜漫縱橫濕突烟難起荒庭草  
欲生端居觀大化抱膝絕微營自顧貧非病堪嗟  
學代耕方慙聞道晚始悟視名輕終當謝人世偃  
息返柴荆

同陳石亭太僕訪顧東橋山庄因縱遊山  
寺承徐九峯道人見問遂以貽之

端居不自適訪隱出郊原一路通樵徑千山拚草  
門披雲開竹院斲石采苓根農事興南畝漁歌到  
北軒聞鐘尋遠寺憇杖眺孤村虎守林中臥猿  
講後言巖花難辨色谷水不知源因愧微官傲彌  
欽至道尊君將聞好事書此一同論

夏日田家

首夏新晴後田家事事宜耘耔知土性老少話天  
時野飯初登麥家資在種葵燎原延暮燒築圃待  
秋菑谷鳥臨耕勸蹲鴟往餉持相逢矜力作不識  
但蚩蚩

觀周明堂故基在泰山下

帝行先出震茲土表青陽對岳朝群后膺符築九

房陰陽隨向背天地象圓方環水形裁壁疏牕色  
順鄉時巡春首幸景側畫偏長禮樂承三統華夷  
奉一王經年宏構泯易姓故臺荒難覩周人制徒  
聞王者堂基崇占積厚隅廣卜圖昌禾黍榮爲壠  
牛羊踐作場竚贍停服馬不至感鳴凰勿須傷已  
毀布政俟 今皇

題賓野堂贈胡竹亭司寇

芳村帶近郭大老此安居闢戶延遙巘爲園激淺  
渠虛亭脩竹拂曲沼小萍舒閣庋恩存詔門懸子  
告輿家中婚嫁畢世上是非踈日抱藥邊甕時巾  
花外車燃燈親把筆抽牘自藏書揮金宴閭里何  
似漢廷疏

題泮東書屋贈萬治齋中丞

巷陋因仁里隣芳接泮宮幽貞存士業恬素作民  
風自適藏修理寧謀結構工材完兼善斲石密復  
加礮草木終朝靜圖書積歲充觀物唯戶內覩聖  
卽墻東經幄芹香入墨池壁水通青衿時晤語章  
句滿專攻跡掃柴扉闔心清牖漏空無爲一室老

柱石正須公

宿上清道院

稅駕遵山麓爰得老氏宮入門聞芬馥行逕悅青  
蔥靈草色難辨幽禽聲不同泉流瑤砌上池照綺  
楹東菓藥榮冬日松筠含夜風輕雲拂修棟皓月  
澄高空晏坐諷道言心怡一窓中永願託茲土餘  
生於此終

芝山屠東崖招遊

平日何所適我友惠嘉招因輟几中牘言揚塵外  
鑿解紳掛庭柯躡籜窮山椒霜後千林肅氛收四  
野遙坐來生氣象對酒息紛囂鴻鴈飛寥廓葭菼  
變蕭條目騁天地廣心清草木凋佳景貴良晤非  
君誰見要

皇帝察宗室子弟之賢孝者制爲訓辭以  
美之且以爲教也而崑崙公以孝受褒  
叅政某來使河南獲聞其事賦是紀之  
有美稱公姓承華自本支生身忘寵祿愉色悅嚴  
慈樂備無聲聽居防履險危藥啗許子誤羹笑頰

人推飲食溫良善晨昏居起宜橘踰淮水熟笋迸  
雪林滋取器遵親滌縫衣學稚嬉秉彜齊一介受  
福冠諸姬褒詔天闈出修文史筆摘琅瑤周國耀  
綸綍大梁垂偃僂循墻走尊崇結閣貽來旬叨佐  
岳采誦慶宗儀

贈鄉飲酒衆賓張公

張履石翁壽七十有五有司請爲鄉飲  
酒禮上賓鄉人皆慶某爲賦十二韻詠  
一時政俗之美以爲翁賀

皇家文盛日海寓澤熙辰遵讓興東序迎陽及上  
春三衣叅舊禮八簋備常珍象壁池形鑿鳴鼉鼓  
奏振若翁躋保艾末俗見含淳抱甕除機械爲樗  
逭斧斤全真同楚老忘力比堯民齒號邦人父賢  
克國子賓衣裳明主賜几杖列侯陳有祝寧憂鯁  
無譽可飫醇威儀終秩秩觀聽自忻忻在燕非毛  
髮能將義接人

送梁宅之葬

寒郊暮雨濕來送故人行死生奄異域歌哭不同

情虛位將筵列求神把酒傾縞衣非結綬白馬爲  
悲鳴柳聚車容設蒿虞曲挽驚重泉無返路九地  
是佳城司馬書猶在中郎女未成休論身後事空  
有世間名此日金蘭斷何時玉樹榮莫邪長閔矣  
光氣罷干星

張淨峯兩廣功成復命提督湖蜀三省平

蠻軍事賦贈二十韻

漢室預三傑宗門挺再生書仍橋畔得籌卽幄中  
成混闢鍾靈異掀騰出衆驚踐敷初詰屈際合果

昭亨禮樂真謀帥詩書可用兵地奄義叔宅機握  
伏波營郡有前朝棄城多故尉爭按圖徵土貢內  
面奉王正文武扶今主韜鈴付夏卿忽移無棣履  
往致有苗征不改登壇禮親題賜劍名競業方受  
脈節制更持衡大事精蒐壯微軀感激輕軍容下  
瀨整殺氣渡瀘橫威已諸酋憚師兼長子貞居然  
收上策坐見靜南荆崩角雕題拜飛星露布行禽  
蒐休義憤草偃服夷情國倚安危算人推儒術英  
千官陪飲至好及上林鶯

送林退齋中丞巡撫湖廣時方有征苗之  
役張淨峯公往爲總督故未及之

江漢流南紀衡疑極帝巡肇州荆最遠列國楚難  
馴分鎮由來重仗材此日真威清霜簡峻寵建隼  
旗新儒學今乘勢朝廷正用人憂勞陶甓設瀟洒  
庾樓親執法兼移俗治軍更訓民百城迎按節二  
列喜行春太平多釁日小醜未康辰問罪楊旗正  
觀兵授鉞頻壺頭屯組練夏口逼焚塵凶吉資奇  
算安危倚大臣寧論權獨任還以德爲隣贊禹公

如益唯須舞七旬

寄贈李三洲中丞公征蠻十五韻

國有鬼方伐公膺神武求心勞邊圉計義副廟堂  
憂參伍看窺敵淵闐起壯猷善師遺下策決勝得  
前籌狼角芒初長龍標祲欲收蛇蟠奇布陣虎旅  
誓同仇賈勇皆超距先登自挾輶氣將忠憤作誅  
靡歲旬留螳臂當車奮魚鬣入釜遊殷紅塗草木  
慘黯變川丘止殺嚴申令貪功怒未休搗巢妖箐  
淨洗刃惡腥流築觀崇岡勢回軍小海謳文儒兼

武備道氣出陰謀磨壁題華界投戈憬衆首如何  
論鉅盛方叔再興周

寄壽顧洞陽二十韻

明時方貴齒令德復推賢華胄承源遠高門積慶  
延羽儀塵壻表神觀沈瀟先茨墅寧述道樓居卽  
是仙枕藏鴻寶訣幾契漆園編玄鶴元長算靈椿  
本大年蕭疎霜髮凜綽約雪膚鮮金重腰能勝膳  
珍腹每便平生悶點檢心事絕疵情指屈讒誣盡  
眼看權勢顛降祥真有在受氣果然全孫曾森玉  
立軒冕會蟬聯難老由和萃尊齡羨福駢典墳晚  
好甚池館野情偏勁力徵書法精心入詠篇鳥花  
愁品藻金石盛鏤鐫尺牘人懷去佳章客誦傳瞳  
方微露角背繭欲生綿喬衆仍茵鼎園黃却邑鄺  
他年輪壁聘更老帝筵前

寄壽華補菴十韻

間氣合調鼎中年遂掛冠沉思存竹素神授得金  
丹谿谷叅玄理丘園縱大觀開池馴浴鵠剪圃毓  
芳蘭鄴架頻經閱陶琴不在彈形全糧可弭事省

夢常安筭甲天行遍孤辰夏日曼籛心應已化椿  
頌自多歡魚鳳瑀盤重流霞玉琰寬遙知賓客盛  
佳氣集門闌

附五言絕句

夏日病居雜興 十首

我病如草木夏日益以長不向本根誅何由柯葉  
攘

空室寂無人幽襟坐自整吾心已不疑何用論弓  
影

四體不可風多汗常如沐却妬西園裏涼颺振佳  
木

寥寥誰與論悄悄自懷恐他日理韋帶知當移幾  
孔

雙眼如深谷顴峯爲高岸撫鏡不欲窺自怪非吾  
面

種藥元因疾疾如藥草驕壞欄除藥本與疾兩道  
遙

家人迎醫至與語黃岐事答言君已知揮手請相

避

十旬九不食氣息微微續豈必覓仙方卽此堪辟  
穀

一卷黃庭經藏在枕頭裏因病少靜清聊得刊數  
字

素約山中僧來期不煩訂今來問法門果識余非  
病

遵巖先生文集卷之七

遵巖先生文集卷之八

七言律詩

萬壽節侍班奉天殿東丘集齋侍御二首

風生露掌集祥鳥雲耀紫清五色殊宮扇徐開蟠  
雉尾爐煙高裊繞龍樞燎移百辟珮環列星落千  
門簇仗俱虛薄自慙違補衮瞻依叨從効嵩呼  
鷄籌魚鑰漏聲催鳳闕龍樓拂曙開五色祥雲扶  
北極萬年天子在中台仙人樂奏鈞天上王母桃  
從瓊水來獨進千秋金鑑錄侍臣不愧九齡材

元日侍班奉天殿

王正元日新堯曆天子明堂拱舜衣仙樂同鈞諧  
鳳奏文星合璧抱龍旂雲間閭闔鳴珂入風轉爐  
香惹袖歸三載郎曹淹赤紱尚慙補衮寸心違

三日偕容臺諸僚友遊大慈恩寺登鏡光

閣卽席賦

鷲峯飛宇孤逾麗鳳甸晴煙翠欲重北海霜冰虛  
暖氣西山雲樹散春容殊方天地愁目盡此日登  
臨新歲逢況是携遊俱俊逸但教得醉任萍蹤

四日陪夏桂洲學士南郊觀牲

皇州風轉翠雲遊光湧南端璧月流珠樹靈壇春  
漠漠尚芻御廩夜幽幽天迴淑氣蕃蘋犢苑靜繁  
星散旆騶視滌逡巡移劍履明禋優渥動宸旒

送鄭滁州

與子避居潞水上憶在東曹詩興多二月風煙辭  
省闈三吳書劍阻關河花明江驛下帆影棹入滁  
陽近楚歌此去琅琊堪吏隱醉翁亭古發煙蘿  
同郭水部子愚東郊相士因遊邵氏莊

郊行不廢觀遊興戚里園中事事幽變幻羣峯開  
華岳霏微五月動清秋風來繡戶聞啼鳥雨溢金  
塘聚浴鷗杖策况隨滄水使解纓長羨白蘋洲

寄贈寇體乾進士尹廣平

羨爾獨隨飛鳥去邑人遙望雙鳴騶郎星天近輝  
昂野薊闕雲生接冀州潞水署香曾對酒朔塵官  
况復經秋少年作宰定嘉績千里相思罷倚樓

送黃後溪守灑州

仙郎粉署有聲華五馬鳴呵出帝家漢室淮陽還

去國王尊蜀郡並驅車煙塵晝靜天邊癘霜雪春  
行江上花此去何須愁道路薄遊今已困風沙

至昌平有感

遠郊風葉點人衣近郭危樓敞暮輝山迴龍虎皇  
輿壯馬放駒駉戍鼓稀日月行藏玄鳥逝關河感  
慨白雲歸時平守帥空喜莫使燕雲羽檄飛

朔日昌平城登覽二首

上谷孤城對水濱滿城冬旭裊煙氛天開秦塞饒  
黃草路入皇畿長白雲萬里烽煙代野至五陵佳

色壽山分四夷自古明王守勒邊誰數李將軍  
宿雨山城淨曉暉高樓 眺思依依仙人枕上雲  
初散白馬關西鴈自飛古木寒鴉啼朔霧荒陴遲  
日上征衣天山直北誰傳箭日斷秦兵未解圍

望居庸

天山九塞有居庸設險功誇六郡雄山連白馬懸  
胡月塞壓黃花多朔風未報捷書飛大內尚聞獵  
火照雲中北平飛將今誰是東南芻輓已無供

悼陵陪祀

絕壁丹流萬葉紅秋峯長鎖翠華宮愁雲玉座松  
楸裏落日金鋪霜露中鳳葆虛留栖漢月鷄鳴無  
復賦齊風聖情追遠遙悽惻冠舄趨陪百職同

泰陵

敬帝垂裳上造日遐荒扶杖中興時宵衣午座蒼  
生繫國論邊愁大老知四海未銷虞陟淚千官尚  
想漢宮儀鼎湖惆悵空龍馭瀚海風生萬壑悲

望陵

本朝陵墓枕天山巖嶽護靈虎豹閑入夜梧楸時

浙瀝飛泉礪壑晚潺湲龍藏萬里蟠王氣象衛千  
秋控帝關瞻望不勝埃滴意嚴趨神路珮珊珊

功德寺觀三官感懷二首

丹梯翠壁鬱煙霄宣帝行宮鎖沈寥牧馬池荒殘  
白草釣魚臺古長青苔宸遊夢到華胥上仙仗巡  
非汾水遙曉向危樓瞻氣象雲端佳色護岩堯  
憶昔宣皇遊幸初時看水艦戲西湖江花海石藏  
秋浦雜珮華裾駐玉輿天地百年殊感慨日月三  
殿自虛無登臨欲下牛山泪檜栢吟風夕照孤

望湖亭

望湖亭倚碧山隈不盡長天萬里來水闊槎從雲  
際泛波涵山是鏡中開霏霏曙靄芙蓉落宛宛晴  
沙鷺鷺迴垂釣解纓本吾事臨風把酒興悠哉

龍潭

臥龍潭在碧山岑噴沫蟠渦自古今隱隱蛟蜃逃  
靈氣時時風雨激高吟青天日月懸相映白晝雲  
雷黯自陰會見九霄噓黑霧即看四海望佳霖

呂公洞

高頂可憐呂公洞礪砢危石相住撐根豁一門山  
欲斷泉流四 晝常清險絕故須秉燭入蒼茫祇  
恠傍雲行藏虬蟠夔理或有冥搜恐觸神物驚

碧雲寺晚飯

近郊蹙踏已塵跡抱郭清切復禪樞斜陽古殿鴉  
亂集積水短蒲鶴並呼客病正宜依梵寂情超直  
擬仍仙都憐爾風松故相憂倚此煙茅絕可誅

出碧雲寺道中望香山

迴馬已失碧雲寺舉目還望香山陞峯巒近日秀  
可結樓閣棲雲深不移靈帝翠旗颺欲下仙人玄  
鶴飛相隨瑤花瑤草如可得青藜白蓮任所之

登圓靜寺後山携張子汝思

策馬清隨滄水吏捫蘿幽到碧山岑最憐絕壁流  
霞氣況有澄湖清客心落木蕭疎明遠近行雲縹  
緲靜高深靈芝紫蕨亦吾分石髓丹砂與爾尋

宿碧雲寺

杖藜日晚尋丹壑解騎霜晴宿碧雲十月懸泉飛  
玉瀑三天現鏡轉金輪雕梁曲檻蒸霞氣翠瓦朱

薨墜露紋石榔牛山俱有恨長留涼月照瞿曇

宿混元靈應宮

玄宮東瞰皇畿迥碧水西滌漢甸斜初月清懸仙  
子洞歸雲深擁羽人家珠林招近千年鶴瑤篴分  
探九鍊砂未駕青牛凌紫氣且乘白鹿住丹霞

鎮國寺與張子對酌夜談

松栝枝圍廣岫陰仲冬涼月靜蕭森青山白水隨  
生事高榻芳尊共解襟畫省香煙空入夢遠公白  
社許相尋依栖擬問三天法長嘯真懸萬里心

贈王仁和邑博

廣文先生咲索居越中勝事定何如雲峯對席惟  
耽酒芳草閉門足著書觀海秋濤天地浴彈歌夜  
缺斗牛虛旅山寂寞梅花晚遲爾六橋白鹿車

病中呂從野水部邀不赴賦謝

宮雲曉度濕晴沙退食煙齊省樹鴉燕闕春回催  
玉羽鳳墀日暖映金花文園不起茂陵臥朔雪虛  
迴剡曲槎綺席瑤觴違命賞露蘭風草惜年華

病中謝鳳儀過訪

一春臥病長安裏伏枕荒齋嘆索居風動蓬窓依  
玉樹雲傳仙侶駐瓊琚宣城鄰金違下榻司馬窮  
愁錯著書四海弟兄吾與爾霞冠月舄未應踈

送阮仁化邑博

庾嶺雪深君獨徃曲江風遠故遺思風流苦憶青  
瑣在身世難忘白髮欺阮藉沉淪元嗜酒鄭虔樗  
散亦能詩行歌莫近啼猿樹宦隱真堪采藻池

送黃長興尹葵峯

兩年見子開青眼萬里共依帝闕雲剖竹新分鄣  
子國携琴遙向越江濱青春黑綬光堪拂落日離  
歌調忍聞雲水峴山多勝事風塵愁望正思君

金山雜詩八首

崔嵬樓殿俯金山窈窕亭臺引玉泉羽獵連屯萬  
虎士水嬉齊奏六龍船徵歌樂選燕秦伎聽法筵  
參摩遁禪宣帝巡遊甘脫屣侍臣扈從總登仙  
武帝乘輿駐翠微西山重見五雲輝羗兒掣馬行  
營疾校士射蛟水檄圍霞氣如臨仙醴瀉泉聲故  
近御筵飛至今草木遺光寵日暮遙瞻冉冉暉

香嶂迴巒莽不分紫煙蒼靄晚氛氲樓臺拔地千  
峯起鐘鼓中天四柱間畫棟雕甍回日月曲池伏  
竇定風雲高僧盡住黃金宇護勅金鑄睿藻文  
康定陵前栖夜鳥盤林鬱鬱鎖松梧總聞再造驅  
戎虜不見千官拜鼎湖內使司香開寢殿祠臣常  
祀掃金鋪翠華縹緲空中度絳節靈應羣帝俱  
珠奩玉盃扈繁芳遺令千秋祇自傷落月恍聞環  
珮響陰風猶散綺羅香蘭蘅湖上疑湘浦雲雨峯  
頭似巫陽寂歷羣山花自發爲看當日倚新妝

翠壘青塚碧山隈銀海銅泉中映迴百歲吳閭寶  
劍出一朝茂苑玉魚來牛羊晝下新樵徑牧豎夜  
窺舊鎖臺又道東阡營石槨路人徒有雍門哀  
青郊迤邐接城闌湖水西來繞御津錦里豪華紛  
轉日芳原池館錯圍春金堆石谷朝專寵玉瀟盧  
塘帝近親三輔選遷元此地五陵俠貴定何人  
西山巖嶭奠金方白帝精躔龍走藏水學澗伊縈  
洛邑原開鄜杜壯咸陽雲霞氣結青蓮宇粳糝脂  
流碧玉光恒鎮滹濤天地險湯池金郭帝王邦

春日 和夏桂洲尚書韻

仙萸二葉耀春明  
御柳含煙拂錦城  
北海鯨冰衝氣動  
西山霞樹入看平  
旂迎周甸輝龍藻  
樂下堯庭雜鳳聲  
獻歲栽花光聖壽  
晞暘歌舞應時清

附見夏尚書作

二月逢春春日明  
鮮雲旭日冠高城  
千官表拜當華歲  
萬國朝元賀太平  
冰岸煙濃將柳色  
花林風暖欲鶯聲  
承恩未獻椒盤頌  
珮玉瞻星下紫清

春日東郊二首

仲春郊時望春來  
待鳳城東旭日開  
錦里恩輝多邸第  
青陽氣色滿樓臺  
遷鶯出谷風徐應  
變柳分林霧暗催  
熙澤幸逢羣物泰  
全生竊荷大鈞裁  
花外雲煙接禁長  
東郊風日麗新芳  
飛峯冒靄全低樹  
遶澗分流半入塘  
角戲游塵遙辨陌  
探丸狹騎競趨塲  
迨時行樂須華盛  
碧草萋萋不可忘

東郊朝日壇

扈扈崇壇冠景崗  
翔梧灌梓鬱分行  
金鋪翼鳳層壇列  
玉磴疏龍四陛張  
雲氣承暉皆赤色  
靈坻郊

位正青方欲觀聖製光宸極為識羣心奉太陽

奉祈於朝天門迎詞

漢主齋居太乙壇方春修祀表祈年祥虬扶籙交  
仙葆青鳥啣書近法筵尚璽親承蒼玉案羽師跪  
授紫泥編長奉光天神道教登釐無謝福為田

春日觀南城同禮曹諸子三首

城南林囿窈逶迤雲裏樓臺互蔽虧半綴朱欄千  
品實全交繡戶萬年枝河流倒接星潢注峯起如  
將日觀移在昔躍龍餘聖跡于今試馬耀乾詞

離宮徃徃像神仙誰擬甘泉起漢年複道橫看連  
象緯曲房深轉貯雲煙穠花齊發粧靈圃雜樹分  
榮蔭御川但覺觀遊皆出世不知劔舄已昇天  
朱曦禁苑盡芳菲傳道宸遊轉翠旂製拱珎金丹  
鳳絢疏橋累玉素虹飛風泉數處歌絃合花萼千  
名錦繡圍正覩乾行行幸處修恩無地不光輝

東昌題任元樸御史園

選地幽棲近水湄野人爭席鳥忘機垂楊裊裊供  
書帶蔓薜青青取製衣不學蔣園延客少却嫌鄭

谷受名非任公本擅投綸術可以方壺作釣磯  
謫毘陵發都下

臨岐南北垂雙淚誰識楊朱失路嗟在野自疑非  
虎兇此身已解作龍蛇壯圖中失逢時感埃罪南  
遷拜惠嘉恩予晉陵猶不遠其如卑濕類長沙

至晉陵

本因懷壁自招尤覆水成泥豈再收行澤却防漁  
父問入山恐負晉君求束書長嘯辭京邑捧檄遂  
巡到本州入境棲棲誰解者傷人應謂一官謀

在郡作

憶從束髮通朝籍才薄遭時報効賒直木孤生先  
得伐明圭太潔易成瑕朝天路絕辭風葉去國身  
輕失水查竄逐元非明主意啣恩不忍赴懷沙

月夜同姚在明濟上觀水

盈科流水濫湯湯映月涵空更可望泌沸千淙珠  
比色澄泓一曲鑑為光遙遙銀漢微分景宛宛金  
隄與障狂取適有同蒙吏傲兼携惠子在濠梁

贈郭水部郎中治河

河出崑崙決孟津司空治水智如神下槩欲濯淇  
園竹荷鋪皆徵韓國人玉堰七星遙證斗金隄千  
里不飛塵若逢漢帝來沉璧應免從官助負薪

彭城送謝道安舉人應試

少年挾策趨上京俊美多才衆所榮稷下雕龍叅  
辨駕郢中白雪擅詩名他鄉不料逢論舊臨水那  
堪復送行旅竄慚予非狗監聞君已賦子虛成

江上送毛太守入覲因寄舊遊三山諸友

念別須臾已歲餘忽逢江上意何如心悲不語傷  
時事眼看雙分畏簡書遠水片帆天際沒晴窓古  
木岸邊疎故人相見倘相問芳草閒門是謫居

留都二首

徒然往日矜佳麗地作天開祇在斯吳楚近郊庵  
作苑江淮流水卽爲池塵遮白日疏三市象應星  
文置百司太息六朝詞賦客何如生覩盛全時  
帝京歌舞盛歡娛表裏山川勝畫圖金埒藉茵遙  
出郭朱樓照水蔭通衢妖氛洗後江長靜王氣生  
來地盡蘇若使墨卿稱主客不論漢室有西都

恭覲留都太內作二首

壯麗誰言漢未央  
鈎陳華蓋翼明堂  
千門旭日光  
分映雙闕中天勢  
欲翔前殿曾聞臨  
遣帥離宮屢  
是從諸王微臣已  
恨生時晚拜手  
徒思頌太康  
欲知開造與天侔  
聖迹難尋帝業留  
苑外河山紛  
錦錯城中樓闕若  
雲浮深宮紅樹春  
長閉高掌金  
盤露不流常現遙  
空雲五彩曾隨仙  
仗奉宸旒

春日行觀禁中

高皇帝舊苑二首

千門臺殿碧波流  
咽盡寒聲出御溝  
天上橋山仙  
馭遠人間負嶠禁  
城幽花狂不記當  
筵舞魚巨曾  
經聽樂遊垂柳依  
微春不展為思恩  
幸半含愁  
芳菲御輦屢經過  
寂寞于今歲月多  
草色猶如思  
望幸鶯聲尚解嘒  
當歌更衣帳冷空  
瑤殿窺鏡臺  
荒咽玉河太液宮  
前舊池水年年春  
雨長新波  
寄贈黃宗獻守璫州兼柬顧與新憲使  
主恩懷遠托分憂  
萬里乘空并是遊  
百室日南開  
北戶孤城海上俯  
中流津橋喧處為  
珠市郡國晴

時見蜃樓持斧風流賢使者政成觴咏接諸侯

送郭世重出守南寧

朗寧荒絕不堪栖遊客思鄉轉路迷千嶺驟昏如  
瘴起四時不斷有猿啼編氓半是居蠻峒行路相  
言避毒溪十載播遷仍寘遠好憑鬼卜問南雞

幽居翫雪柬人二首

肅肅玄陰冬布令紛紛白雪晝疑華明姿蔽日堆  
難散弱質凌風舞易斜楚地有田皆種玉寒空不  
樹自飄花此時正憶離居者贈把瓊英比折麻

江城雨雪及春歸三白呈祥表應祈

時禮部祈高雪雪降

素疑華因地積輕盈弄出鬪風飛千峯掩翠皆同  
色四野垂陰倍有輝獨羨仙郎操妙曲聲高真使  
和人稀

移居

栖栖微祿豈謀身擾擾移家學避人高柳欲栽當  
外戶青山依舊借東鄰門無車馬何須僻窓映圖  
書不為貧籍繫中朝心在野誰知陸地有沉淪  
高祠部子述訪予告中值予出遊不在見

投贈章聊用奉薦

因病相侵却得閑一官方在是非間身同雲出無  
留處住近城陰獨掩關高士已題鳳字去野人空  
共鳥飛還閑窓寂寂春光早惆悵清揚不可攀

出遊城南山寺

一官常懶愛僧閑來往禪機每扣關綠柳閉門空  
自長白雲出岫不知還欲牽簪紱柰微力豈少鴛  
花非故山那似匡廬為社者投師不遠栗林間

遊朝天宮

蓬萊元自道家山簾戶陰陰珠樹閑乞向朝中除  
仕版却來方外着仙班花間犬吠知人至空裏鶴  
飛為客還一扣玄關回念想因悲擾擾在塵寰

登江東城樓

花片飛飛柳色深登樓一倍攬鄉心長隄煙草迷  
人去遠寺夕陽帶磬沉江水無風時起浪春雲不  
雨每成陰躊躇滿目誰相會惆悵前林倦翼禽

春日懷歸

東風送煖雨晴春柳色鶯聲滿四鄰道勝自烈千

慮舍身閑何戀一官貧朝來廢櫛看山色日裏倚  
扉避世人豈有微才逢聖代空令失計遠嚴親

遊天界寺逢蔣南冷子雲留贈

香林新雨四無塵綠樹初齊古寺春病起獨尋芳  
草路林中偶接放歌人未酌談笑形相得稍問姓  
名意已親落日還歸城闕去愧君雲水一閒身

請告弗允赴省作

腰章束帶不勝羸還顧自身却自疑田畝難忘平  
子賦雲山也笑尚書期出門騎馬逢人懶曳組升

堂畏鶴知舍裏青青青春草待若為留色慰幽思

請告弗允後寄蔡比部道卿

無才豈料乞身難強學城東且閉關世事浮雲機  
久息故園芳草夢空還春栽藥品因多病日裏圖  
書轉覺閒不得自矜年少壯相思一夕損紅顏

省中

古木陰多鷺亂移白雲不去伴留司侵堦草長閑  
終日拂印塵深鎖幾時散地非才容吏傲低頭寸  
祿令人悲頗耽恬曠頻歌枕僕從翻嫌出省遲

哭梁宅之

天道蒼茫不可知，重泉寂寞所從誰。  
祇餘蘭氣芳華省，獨有螢光識敝帷。  
無使求書忘舊草，何人脫劍贈枯枝。  
蕭條落日聞鄰笛，淚盡無由世上期。

和李司業懋欽登廬山石耳峯讀空同先

生之詩作

同聲殊世易懷思，惆悵風流不在茲。  
真蹟愛從苔刻認，舊題多是野僧持。  
張衡不負楊雲待，屈子能令楚玉悲。  
流落當年何足恨，斯文今見後賢知。  
李詩

有誰令流落  
明時去之句

題箬溪草堂贈顧中丞

箬溪溪上箬陰繁，主人葺箬卜溪源。  
近市荒惟三畝宅，負城幽是一丘樊。  
雨滋蘭蕙看成畹，徑長蓬蒿漸塞門。  
大德如今俱小隱，壯懷相對欲何言。

夾浦舟中別李湖州邦良

簑篁夾岸似湘陰，一夕孤舟千里心。  
地遠誰憐臣道枉，官貧轉使故交深。  
幽蘭自馥皆同臭，折羽卑栖各異林。  
臨路殷勤何所贈，匣琴珍重少知音。

遊茆山贈兩道士二首

厭世歸心大洞天玉皇按籍許爲仙身飛金策朝  
元去手捧瑤編拜闕旋白日鷄鳴霄漢裏古時杏  
拂羽幢邊自言棄跡方成道枉誦從前內外篇  
尊師得道貌如童追躡岑峯但使風每道姓名千  
古上時聞笑語五雲中開山指領逢秦禪行洞應  
知與蜀通憂患相仍兼疾病願祈一粒發凡蒙

宿茅山栖霞道院

涼月高松翠影長石壇陰洞映蒼蒼山煙發氣鄰  
丹竈澗水流芬漱藥牀靜見道心生白室閑披仙  
籙檢青囊投身未卜他年計明禱茅君一辦香

游茆山東唐太史應德本與唐期往而予  
不能待因以嘲之

聞有人間不死庭遂歌招隱浩長征巢鶴青松年  
共老經泉白石色兼清神君跡化名空在幽洞花  
深客自行爲語稽康仙分薄縱逢石髓也難成

寄題吳興吳太僕園亭

吳興本是佳山水况復名園選勝開曲引茗溪來

漲沼平分峴石作層臺琴書數處無塵事花鳥三  
春有酒杯他日南尋天日頂因君清暇得徘徊

餘于李春江先生致魯國左相而歸先生

昔二泉郡予方髫年在諸生中最荷獎  
識展拜感舊情見乎辭

登堂懽宴把冲襟為問先生邇在林晚愛溪山輕  
相印日邀里族費家金門前流水心俱遠市裏囂  
塵跡自深却憶受知童子日空然長大祇如金

寄陸憲使選之李提學雅大田叅知叔禾

三君昔同禮曹今俱官嶺外

端居離索嘆盈襟却記當年寵遇深抽筆每叅原  
廟對橫經曾侍辟雍臨恩私難恃看孤跡職事無  
稱抱寸心嶺鴈江魚俱寂寞相思何處寄同音

送陳中川之汴藩雪中作

衣冠出餞曉匆匆白雪紛紛灑映空皜素明姿偏  
敵日輕盈弱舞不因風裊塵故為迎新隼飛片猶  
如點舊驄獨把瑤華當別贈清輝瑩質與君同

題將軍遊騎卷

青青細草滿平原故將飄零馬足閑春日朱樓垂  
首過暮雲赤坂獨身還偏裨各散他門下歌舞盡  
銷舊帳間明月瑠弓閑在臂不忘掛箭出天山

送宋龍門行甘州太僕

磧路蕭蕭關樹微君行萬里事戎機忽到河源知  
地盡試登隴首見人稀時平塞下降羗靜野曠秋  
餘牧馬肥却笑漢家求大宛貳師再出只空歸

論文示門人方元煥晦叔

琴名綠綺舊曾携柱是連城明月輝曲裏其人如  
得見彈來於世肯聽希終身已分長拋擲拭目聊  
爲一取揮傳得廣陵真散後莫令手指與絃違

樂平道中暮宿田家

風雨蕭蕭僕馬煩客身寂寞託空村深聞夜杵應  
傍舍靜對寒燈獨掩門難竟孤眠尸吏媿猶慙一  
飯野人恩晨興欲問田家樂官騎催程不得言

德興道中柬陸毅齋憲使陸君昔同在禮

部

客意悠悠忽自悲容臺憶共奉恩暉春城柳色趨

道藏文集 卷之八  
朝入天路香煙扈祀歸官冗方知思昔遇途危猶  
未覺今非舊遊零落俱何處職事逢君得暫依

臨川郡樓張都閫招飲

樓閣崔嵬俯一州當樓置酒楚天秋參差梅柳軍  
中樂高下溪山城上游席照滿輪宜取醉林飄一  
葉正關愁銀瓶頗怪傾難盡曾換將軍舊紫騮

中州道院夜宴

孤舟宛在水中央仙洞深深草木香林下鶴行隨  
得路徑邊蘿蔓過罨裳興來斟酌瓊漿瀉吟罷參

差玉樹蒼白露滿天河漢淺還城燈火一川長

逢鄭廣文先生

童年釋菜及門牆在泮常依芹藻芳座上談經分  
半席齋中鳴鼓接餘行徒持章句貪干祿獨守簿  
書媿省方十五年來音問闊何期今日復升堂

贈郭僉事以亨起復入京

風塵淪落故交忘水上相逢益自傷持牘空慙勞  
吏道操觚終念戲詞場須臾握手王程迫牽引離  
心江路長此去帝鄉應似客除書不省出何方

江干春評事使南昌予適以事行部豐城  
走筆寄贈江雅善鼓琴因以琴爲賦

古琴宛轉作龍形絲白桐堅各有名桐出嶧山孤  
幹植綵從天漢七襄成何言異質元同調不是知  
音豈發聲水綠山空清夜裏如聞別鶴兩方情

予行部豐城建安李君時言往提學滇南  
道出茲邑相見甚懽君出高文見示稍  
爲論訂遂及性術之辨最多往返

一從爲別苦無懽汨汨交遊意不存此道常遭下  
士笑將心懶向世人言斜陽萍水逢攜手深夜蘭  
燈惠討論不悟當筵忘肉味含情相對似窮源

廬山

衣袂翩翩接鳥翰管迴磴道出千盤峯巒拔地紛  
殊態樓閣中天起壯觀斜日色開三楚秀微雲陰  
散九江寒將同名嶽期終老且向匆匆客裏看

春雪同省長諸公讌集

終蟻然宵深院闌廣庭積雪不生寒春聲笛裏梅  
花落夜色杯中竹葉乾座上拂衣先起舞燈前改

席更留懽人生分合兼衰健今夕須知一醉難

宿天池寺示同遊薛仲常

在世多憂坐自拘微官未得惜馳驅因尋絕頂逖  
人跡偶滯高齋減病軀理髮晨光窮石鏡焚椒夜  
氣對香爐一心生滅元無取不語但應爾與吾

香爐俱  
峯名

宿天池寺明日下山寺僧相留予愧其意

爰題西壁

陰陰松竹覆層巒蘭若深開曲徑寒樹裏燈緣傳

法現林間花是講經殘窓臨石鏡天長曉門掩珠  
簾夜欲闌釋子相期無以荅未除妄想為微官

登佛手巖屋角嶺諸山

緣崖百轉幾經休迴複千峯晚氣浮路絕見僧行  
樹抄猿鳴呼客入林幽平看珠斗懸燈影俯瞰明  
河激澗流頗似謝公高簡性領州不自廢山遊

由大林寺尋講經臺因循香爐峯側下山

千尺飛蘿手自援鳴泉數處弄潺湲半峯栖霧逢  
僧濕絕徑穿雲見虎閒岸幘正宜巖石上褰衣時

遶巖文集 卷之八  
傷竹林間夕陽翠巘看尤好去路心知是下山

暮雨投圓通寺宿

野色蒼蒼遠寺微因聞鐘梵起歸依僧閑正伴谿  
雲返客倦偏逢夕鳥飛一院燃燈通暗路滿空香  
雨沐塵衣齋心願學無生理漢綬嬰身嘆跡非  
得舍弟道原書欲來豫章久而未至

報書省我喜終朝日日相望竟寂寥尺素翻疑魚  
腹幻寸心真惜鴈行遙夜長絳蠟花空艷秋色芳  
池草已凋愁極欲將荆樹植連枝照室免蕭條

除夕示原弟臥疾

深夜殘爐火剩紅如灰一念懶書空欲歸舊里時  
難決未遂初心歲又窮寒色暗消燈焰裏春光細  
入漏聲中客居寂寞真憐汝骨肉情親病亦同

元日於藩省祝賀述懷柬徐少湖太史

蒼蒼寒色滿嚴城霜露樓中刻漏清煙雜燎光看  
曉淺風搖燭影覺春生壯心已謝鷓鴣侶病齒空  
餘狗馬情才薄本宜長遠斥問君何事厭承明  
送袁生應樞携室入京覲省嚴介谿宗伯

素生宗伯之婿

青青春色起平蕪客路携家正可娛雪映船窓開  
卷用風吹江水掛帆須丈人已立中朝岳愛子真  
還合浦珠借問南宮趨侍處何如片玉在冰壺

送孫豐山叅知入賀

明堂大享禮成孫與予先後為禮部

送君南浦思翻飛前後為郎入禮闈直以遊談叅  
制作更持文史荅恩暉周南跡滯臣心遠汶上圖  
興帝道輝舊賦甘泉還有筆好將再染奏垂衣

送方菴庄僉憲入賀

明堂禮成

豫章解纜雪晴消計及長安淑景遙垂柳新陰看  
向苑啼鶯初曉喚趨朝心同江水知歸海身在鈞  
天喜聽韶左个春開應有問何如衢室帝為堯

春居明  
堂左个

遣興

生平不省緣何病日夜憧憧抱百憂自向心中除  
害馬便將身外等虛舟好閒幸爾遭無事寡援寧

須請絕游竊比前人爲祿隱不妨世上且沉浮

再至德安公署

爲官懶拙本無稱樂業田間寡訟爭閑署簿書終  
日靜孤城草木及春榮行庭最愛蒼松色隱几翻  
嫌鳴鳥聲屢向此中民不厭年來自哂近人情

錢侍御出遊東林子留江州城中阻於陪

從作此奉柬

達人瀟灑樂煙霞自向東林問楞伽脫却繡衣掛  
貝樹更騎驄馬踐香花坐中山色夕陽亂門外溪

聲春水加城郭匆匆多事者愁看遙巘片雲遮

錢侍御宿天池寺疾作召醫予屬有事不

及往問以詩代柬

聞君耽臥南山阿爲戀繩牀起病魔法鼓揚聲生  
寂滅香池涵照洗煩疴翻經半與方書雜飛靄偏  
從枕席多問訊有懷難自往空令示疾作維摩

送趙教授志貞

居藩寂寞久無歡聊爲伊人一解顏嗒然語合形  
骸外去此交存神氣間共指馳驅循大道更期著

遺巖文集 卷之八  
作副名山一尊臨路情難盡原草含黃暮雨閒

移官河南報至作

赤雀翩然啣尺書書中忽報有新除世榮已付浮  
雲外生意翻回腐草餘悔把青黃災斷木却教鐘  
鼓饗爰居一官虛謬頻遭調寂寞楊雲愧不如

過劉實夫墓下作

斜陽片景水潺潺堪嘆先生永閉關寂寞一杯埋  
白骨簫條幾樹掩青山不懸寶鋏枯枝上空灑瓊  
珠宿草間人世相期那得見千年應作鶴飛還

弔李空同先生

空同先生之風予慕之久矣無由一見比  
以謫官稍遷汴省護訪故廬而先生冢子  
伯材亦辱過從之雅故末句及之

大梁竣罪異長沙託賦河流比汨羅明月投人遭  
按劍陽春驚衆寡賡歌幽扃路閉黃鍾絕副寫書  
藏玉屋多論次舊聞應有泣史談遺業竟如何

蘇門山

性愛名山恣懶頑每逢佳嶽一開顏岑峯忽躡蘇

門頂清淺兼臨泉水間地勝絃觴寧爲賞心閒魚  
鳥却相關坐思善嘯巖栖者不得神遊接往還

### 百泉

名泉千派遠共山匯作共池碧樹環外物都從泉  
上淡中心獨向樹邊閒鷗鳧群戲翻珠碎荇藻叢  
生點鏡班此地真宜投袂隱堪悲朝徃夕來還

### 送胡中丞可泉西歸

廣野微塵柳眼青衣冠飲餞一城傾還家且有藏  
書富解組真同脫躡輕路出嶠陵桐樹盡旌飛灞

岸嶽連迎歸田賦就身猶繫因送將歸客念盈

方有乞歸之  
疏故末句云

### 送竇憲長入覲

離亭杯酒日初曛征馬長嘶首北雲爲畏簡書三  
載覲自陳功伐四聰聞試言定拜綸音重錫宴應  
沾御醴芬欲問風裁清海岱但看滿路雪隨君

### 送正郎之留都

秦淮綠水石頭城此去遙知愜宦情望國定瞻龍  
虎氣登臺試覩鳳凰名風流却值山川壯形勝應

逢賦頌成憑君莫自傷留滯漢室由來重二京

承西亭惠梅愛其香色賦詩

一枝踈淡在銀瓶虛室蕭條冷氣生近嗅幾迴憑  
小几貪看數起繞空楹支離形影元相得寂寞心  
魂轉自清却想前人東閣裏孤花同賞不同情

詠折梅用前韻

月掛踈簾水滿鉞一枝誰折報春生肯辭帝子分  
瑤圃來與幽人伴素楹香雜藏芸飄帙細色侵囊  
雪入幃清漫唱巴歌投郢客引商流徵也同情

雲東次前詩用韻再呈

盈盈素質映銀鉞誰識仙葩此寄生初滿室時風  
入戶正宜人處月窺楹況逢高韻能同好未許幽  
襟抱獨清共指羅浮山上約便堪脫躡世中情

李少泉見投折梅之詠用韻奉荅

紛紛百卉盡爲臣讓却花王占斷春對雪閑吟巴  
里客折枝相贈大梁人微香偏觸觀書夕踈影宜  
看置酒晨異室同心投秀句獨憐如玉不能親

荷亭讌集用龍雲東臬長韻

南薰扇物夏初深久廢歡娛爲客心共得池臺開  
遠賞時將絲竹間清音微風澹蕩輕炎暑竟日淹  
留到夕陰此是梁園歌舞處因抽兔管命同襟

遵巖先生文集卷之八

遵巖先生文集卷之九

七言律詩

壽王閒齋

不好爲官早乞身儵然平世作閒人林中築室知  
山性窓裏焚香養谷神絳老六身推甲子椿年千  
歲是秋春清泉白石長無改應與先生結德鄰

贈李介石徵君

廉似於陵不灌園形骸都喪我偏存機當自適宵  
爲蝶樂少人知曉負暄笑却龐眉謀漢貳嫌將清

耳污堯言獨嗟太白非愚質願事陽居學食菘

同陳瑞山蔡可泉遊覺海諸山

吾生少好獨耽奇更接良儔汗漫期嘯向空山成  
節奏行窺止水鑑鬚眉坐茵每藉林中草解珮時  
懸石上枝顧謂同心高蹈者便堪脫躡視妻兒

由覺海寺訪龜石巖路中作

迴環疊嶂欲迷方來往微通一徑長怪鳥啼多山  
更寂閒花落盡樹還香鳴泉數處寒衣屢側石千  
盤策杖妨沉病嬰身形已廢獨於遊踐力能強

訪何默甫文學讀書山房何兼授徒

一室閒開向翠微獨諧幽意託垂帷手中編絕緣  
披慣舍後園荒爲懶窺林木栖雲陰講席山泉帶  
雨漲書池帳前弟子無休暇共說身親樂事師

訪王閒齋山居賦贈

新晴巖壑翠成圍多暇丘園草木肥坦臥空林花  
墮腹行穿曲澗水濺衣簷楹半着煙霞氣鷄犬都  
忘世俗機一欸幽居生靜逸因思家在市廛非

寄黃小竹遂昌

聞君領縣括蒼東，瀟洒爲官有道風。  
每夜猿聲如舍裏，四時山色在城中。  
壑間置水姦皆息，花下鳴琴訟自空。  
遙憶潘生多暇興，欲將佳句覓來鴻。

聘魏山人卜先大夫葬地同行山中作此

呈之

苦披喪禮不能終，行抱深憂路若窮。  
地上菁莪皆是蔚，林間高樹易多風。  
肖柴病骨擔難弛，絕線愁腸火更攻。  
居倚前廬何日反，欲憑仙術禱楊公。

得東山吉地志喜呈魏山人

芳名表地記東山，佳氣氤氳曉夕攢。  
水學之流成九曲，岡如龍躍自千盤。  
天地應爲今日待，神奇寧許世人看。  
不緣抱痛祈靈術，誰識明師一遇難。

送江山人

山人資術恣浮沉，妙得山高與水深。  
地理直從分野辨，河源真笑鑿空尋。  
折枝林裏成穿杖，舉袂人前表合襟。  
已學蒙莊儲葬具，明師相遇若爲心。

寄贈王秀才客遊括州

猿狖千山易若愁，嗟君聘轍爲誰留。  
貂裘已弊書

難上狗監未逢賦枉投為客應多迎解榻此身且  
作汎虛舟高材豈恨行遊滯侯貴如今重谷樓

送陳西巖山人兼寄蔡鶴山徵士

自將形質混塵煩獨有風人衆所尊託意偶談山  
水事好遊不謁貴奢門道存已解遺身世客倦猶  
思返故園遙憶一丘歸老處惟應禽尚晚相敦

贈魏山人

人人道是郭先生測隴窮支到窈冥流水去來無  
遁性諸山向背盡分形手中青杖標千法袖裏囊

金著一經願禮明師求片語愚蒙何以假仙靈

挽蘇秀才

少年詞學盛朋遊賦命乖違與事仇抱志竟同川  
水逝生才偏使玉樓收托孤內友猶玄髮哭子慈  
親正白頭每把奇文思似玉泉臺冥漠見何由

送陳司訓奔喪還嚴州

摇摇心曲似旌懸望市過城益齟然力盡重趼行  
嶺外眼摧雙涕灑江邊猿啼于越千峰雨星帶嚴  
灘獨夜船舊日門人來卒業經中應廢蓼莪篇

送吳叅議分守承天

昔年白雪流歌地今日黃圖列籙基代卜共瞻龍  
起處汾遊猶記鴈飛時離宮草樹豐馳道原廟衣  
冠闕奉祠最是聖情勤遠念榆鄉節使選材移

翁以時新移所借育泉里莊氏之宅

移居寥僻遠城隈自說近人易染埃愛物還將鷄  
犬去悅生好取菊松栽却笑非公家是寄毋庸謝  
客戶任開白衣教令知來徑欲遣清醕就綠杯

歲首與道卿偶集月臺寺同道原舍第

閑行曾不記春芳忍草當堦忽已長綠茗煙中消  
病力紅蓮焰裏惜年光求聲鳴鳥知聽法承萼開  
花好近香懺悔便從今歲始相期禮足奉空王

春日登城同舍第道原

春城曙色曉葱葱步履危墻已好風萬井遙分初  
日下群山微見遠煙中歌鐘乍動高門閉車馬相  
從大路通不悅紛華惟小謝愛余涼躡肯來同

城樓與舍第書事

城中多事厭招隨獨上高樓愛弟携林果垂枝攀

讓實檻藤布葉取賡題朱旗日閃春原靜畫角風  
生暮野低最是忘歸心會處桃花新吐草催齊

精舍與原弟夜坐論詩

家貧春日獨無營虛館相看兩弟兄窓外方池知  
雨罷城頭片月帶雲行情諧語笑忘年長興入篇  
章覺夜深還就空齋成寤寐池塘春草夢中生

元夕獨坐

幽居猶惜歲崢嶸獨坐迢迢忽二更遙夜紛華千  
品動空堂寂寞一燈明竟消舍北笙歌發心靜門

前車馬行頗被時人譏寂寞胡然閉戶古先生

論學示友人雜詩

十首

克塞乾坤惟此理更無古往更無今一腔子是陰  
陽會七尺身為天地心本是完成寧用補元來無  
失不須尋此語驟聞如未信但將此語細沉吟  
中立亭亭四不偏何人識是靜時專此形而上方  
名道未畫之先自有天尋逐必然終入俗虛空寧  
免誤淪禪莫向其間求可執前人訶破謂無權  
誤學牽纏醉不醒而今指破與君聽沉迷傳註何

殊蠹依做斜條卽是伶過轍却來尋軌道辭家翻  
去傍門庭宣尼若曉今人學應悔當時著六經  
天付於人有此身此身用處是元神眼底自能分  
黑白舌端他會別鹹辛求添一物偏多事巧出千  
般總離真但信本來渾具足先生何用大諄諄  
汨沒近儒文義教一生幾枉速飄風却行翻訝身  
居後兩聽虛疑耳不聰神化何曾離日用經綸元  
只在淵衷從今游衍高明地始免微纏與棘叢  
至道之精豈着言聊將言語訂迷頑心思起處先

離位聲色大時更沒關昭氏鼓琴成毀際輪人斲  
木苦甘間此語諸君如善聽清源山卽是尼山  
埋沒精神鑽故紙世儒拘陋信堪羞專從事業尊  
堯舜直以能多識孔丘懸想一生思出位勞心終  
日困旁求沉綿此疾真成痼苦口良方誰爲投  
好徑人多道本夷自爲煩苦自支離省存判截靜  
和動先後分開行與知敬義夾持寧免二誠明兩  
進已成岐當時呼得曾參唯一貫之餘費甚詞  
筌以求魚蹄取兔兔魚初不在筌蹄畫舟訪劍將

何得買櫝還珠亦太迷牝馬健行知作用潛龍不  
拔識端倪古聖我思心實獲美人遙在一方西  
克盈象器極高深要識惟微是道心何處天明非  
出王未形神鬼已昭森尸居寂寂偏龍見暗室冥  
冥有日臨請驗此時真太宇豈容一物妄相侵

送俞志輔赴闕自效

漢家征虜羽書飛壯士貪恩覺命微手拂龍泉生  
勇氣曾藏豹畧暢兵機將屠吐谷收蒲類願逐輕  
車出武威候印纍纍酌死戰莫愁少婦泣羅幃

文上人房餞徐山人

久耽幽獨類名緇送客還同惠遠期繫勒好嘶香  
草地垂楊偏拂法筵枝杯行寂性生飛動袂惹空  
腸怨別離從此看君分手去更無人復到茅茨

叅知筆峯宗兄將入京道出吾邑往訪林  
居賦此爲別

已無迎送絕入群猶復杖藜出候君耳洗嫌因聞  
世事頭風喜得誦新文中偃息慙龍臥陌上差  
池惜鴈分莫怪臨岐頻悵望有誰人肯訪閒雲

哭朱徵君

斷木已逝斧鑿災又隨流水逝無迴每看佳句收  
詩卷猶憶清言接酒杯蟲污殘編塵几暗猿唵空  
帳石林哀可憐幽徑荒松菊獨向黃泉歸去來

送俞郡守入覲

聖堯爲帝正垂衣高闕四門納九闈鸞珮再陪鵷  
邁入隼旟却向鳳城飛筵開白玉傾心醉賜出黃  
金拜手歸講德著書名樂職應看歌頌徹彤闈

送汪大尹入覲

作吏如仙有道機雙鳧遙向玉京飛爐煙遶處瞻  
天表綵仗開時就日暉理却橫琴調舜曲持將製  
錦補堯衣繁花滿縣舍芳待好帶天邊雨露歸

題畫扇小景贈顧濱洛

齊紈裁扇月形同點染丹青出化工雲氣淋漓疑  
帶雨水波搖漾不關風高低萬樹毫芒見遠近千  
山咫尺通却怪主人多好事置身長在畫圖中

挽黃一崖

嗟來桑扈返於真笑寄人間八十春相鶴經閑窓

映月刻鳩杖倚壁生塵獨遺一世同蟬蛻深入重  
泉治鳥伸從此江邊鷗不下祇緣失却忘機人

贈章三洲

高才早戴惠文冠驄馬瑤珂白玉鞍袖裏諫書人  
不見朝端簪筆衆爭看一封承遣君門遠萬里投  
荒嶺路難折翅鷗鷹仍養翮清秋宵漢待高搏

訪陳舟峰秀才讀書處賦贈

閉門開卷日何長草木萋黃又見蒼坐榻幾穿當  
膝處飛螢多入照書囊荒庭鳥跡翻朝几古寺鐘

聲到夜牀攬鏡莫須愁鬢髮凌雲終自達明光

薛南塘移居走筆奉柬

頗怪日來來往踈因知迫歲始移居徑闢三條同  
蔣詡家存四壁類相如飛螢入夜疑新案巢燕春  
還訝換除借問儲物何所有圖書滿篋趨專車

寄施文山

問君何日滯明時直似朱顏節素絲遠謫長違天  
北極量移猶向海南涯猿聲到舍初休吏柳葉飄  
庭正寫詩玉體清羸應近藥朝食努力慰相思

唐翠軒見過

蒙密城西仲蔚園鷄鳴樹杪類荒村已無奇跡驚  
斯世猶有高人到此門蕉葉聲中欣對雨莎茵藉  
處愛移尊與君且盡今霄興莫聽塔前蟋蟀喧

紫峰先生祠于鄉賢謁拜作

閱歲如川寧免逝惟應名跡不同氓獨行身後興  
吾黨沒祭社中是此人楠刻施丹巖設像池形類  
璧奉游神自慙未死頑龕質兀守殘經媿後塵

訪吳泉濱山庄不值奉柬

二首

東郭先生真好靜柴扉聊寄碧雲間青山舍後經  
秋老流水門前盡日間禾廩不茨禽共食松巢無  
擾鶴知還一屨欲買相從隱此地由來可閉關  
高人好尚在田廬物物幽奇事亦踈雲護籬中曾  
採藥風吹牀上未收書草間遺籍農談處石畔殘  
樽蜡飲餘徘徊欲去還題戶凡鳥深慙我不如

小身巖

白雲無意忽相招轉盡蒼崖更渡橋怪石似將凌  
島岸凋林偏與對蕭條獨行幽谷惟聞鳥欲問前

進賢文集 卷之九  
峯偶值樵擬隱此身須早計莫令桂樹葉先飄

### 慈雲院

新裁巧製成雙屐故選名山試一登遙聽鐘鳴翠  
微半直看花到最高層眠鹿挾起警人語飛鴿來  
窺證佛乘不覺塵心銷釋盡空林晏寂只如僧

送張月洲往南雄訪陳雙山陳時謫爲南

### 雄郡丞

萬山深抱始興城問子胡爲欲遠行逐客未蒙環  
玉賜故人偏繫綈袍情豈學臨邛因邑令也嗤監

里重侯生論文樽酒相逢地上郡應傳有聚星

### 送星士李子益

奇談巧中似君無却把靈占過野居久縱閒心遺  
失得寧將闕術問盈虛夕陽正值青尊盡秋氣漸  
看錦樹疎莫向他人道名姓草萊今已掩荒廬

### 崇陽樓陪汪明府觀燈

二首

交衢如髮敞高臺萬戶懸燈向夜開身出半天星  
倒映人行下地漢翻迴粧邊窈窕疑雲雨曲裏參  
差辨柳梅鳧爲駐時陽艷發共言明府是仙才

千家門戶誇燈勝綴葉分枝巧剪裁霜氣暗侵煙  
更暖風光微扇焰偏催歌隨游騎將塵去人似飛  
螢撲火來爲問河陽花滿縣何如此地夜中開

胡雙華公以春興高詠見示漫賦奉答首

芳草萋萋着處生風煙客裏倍關情高跡自看軒  
冕細道心却向簿書精荒城過雨青春暮晝寢凝  
香白日清最是玄暉多雅興窓含碧岫句偏成  
知君百物不關身也復題詩惜去春總爲吏情嗟  
事迫更緣鄉思惹愁新坐對禽言聊共語見飄花

片亦傷神踈頑敢謂能同調却徃瑤緘示我頻

約齋劉公作壽藏戲柬

超然高識有誰儔不諱生前作死謀百事都忘長  
脫躡一丘預築待藏舟親題幽石因山表選植名  
材繞隧留只把兩間克葬具嘆君曾未似蒙周

送史西厓守沅州

高材領郡武溪濱莫畏蠻荒盛毒氛好變侏僂歸  
雅俗更將清暇訪奇聞苞茅曾致齊人問銅柱欲  
窺漢將勲小西山中藏逸典探幽應得覽玄文

送陳秀才附驛使往沅州

下帷兀兀不窺園躡屨匆匆驟出門獨向五雲馳  
驛騎欲過二酉聽鳴猿携書徧與交游別仗劍曾  
無妻子言激浦最悲騷客賦馮君一爲訪幽源

吳默泉張鄧西二公遊清源山有作投示

輒用奉酬二首

鞅掌何人解好遊高才擁傳擅風流幽花帶雨紅  
初潤密樹含煙翠更稠境勝况兼賓友美心清正  
值海天秋挾摛華藻流宮徵散入無諸古郡州

秋中佳色絕微埃身在高山氣象開縹緲海門蟠  
貝闕氛氲天路出香臺支離邑戍紛如點破碎陂  
湖漂若杯最是登高難作賦諸公賸有大夫才

題九溪書屋贈姚生體乾

高才也有絕塵心獨傍含漪闢遠林竹屋數椽容  
偃仰溪流九派匯清深水光蕩几初開卷漁唱過  
門正鼓琴莫謾掩扉矜遯迹未忘作賦羨知音

贈雙竹

君看種竹滿江南獨在君家世所談特植太孤偏

有偶叢生非貴又無三色搖兩翠祥煙裊影拂交  
陰淑景含若取爲筒清廟奏共言律呂金裁堪

題寒泉精舍贈羅希周并柬其弟希陽君

精廬巧構事全幽最是才人解息游滿室吐芸千  
卷積當堦鳴玉一泉浮含毫每玩霏霏灑行樂常  
通澌澌流更向池塘滋細草春來佳句夢中求

贈姚體諧秀才

翩翩佳士氣翻飛蹴踏千群血汗揮善說尚書宗  
伏勝早攻文賦似陸機虛名枉辱藏懷刺形穢真

慚側玉揮但看才調如君者豈是衡門一布衣

送黃葵峰廣東巡海憲副黃舊爲給事中

緩帶輕裘喜立勲書生獨領伏波軍陰符秘演五  
兵畧寶劍光懸七曜文日照樓船銷海怪霜含節  
鉞淨炎氛西掖聲華人盡識功成早入事明君

送程太守歸養

喜動心顏決棄官寧論阜蓋與朱幡功名薄是微  
臣分乞請俞知聖主恩出入扶持蠲疾瘁晨昏甘  
旨奉溫存君家白日偏長永爲有金花堂北萱

寄大梁高大

極目雲天間阻脩懷人日月易悠悠蓬池靜處堪  
舒嘯梅萼開時每惹愁一日相思腸九折尺書應  
想見千憂莫言行鯉難過嶺自有黃河入海流

宿萬石山道院

暮赴松門非爲倦欲依妙境息奔波燈前鳴磬山  
中靜石上流泉雨後多秋氣漸深聞木葉天機忽  
長在巖阿躊躇不決投身計荏苒其如老至何

送洪克晦尹淳安

銅章綰綬墨華明百里堪言作宰榮江出新安流  
過縣山從建德遠爲城烹魚比政苛應免帶犢喻  
人化自行興革初然民吏笑漢庭終說子康名

寄睦樗西亭

最愛梁園脩竹館風流帝子獨翩翩豪華却盡攻  
文苦寵數偏能養性全馬過繁臺誰可記鴈飛蓬  
沼信難傳山中桂樹偏翻甚寂寞柴扉養暮年

送賓山大士還錢塘

祇說身同雲片閒南遊何事亦思還禪心已寄生

滅外浮跡寧存來往間  
豎佛誰能醉一偈持燈行  
且照千山莫將空性呵  
難別師去吾今又閉關

錢塘縉上人來泉見訪  
值予臥疾不能見  
作此投之

窓中伏枕蓬蒿長城舍  
荒蕪只似村消盡形容神  
獨壯都無寢食息空存  
往時賓友全辭社結夏高  
僧忽扣門莫倚文殊能  
問疾此中欲答已忘言

往日客錢塘住西湖頗  
久湖上山水藪林  
之勝至今猶形夢寐因  
縉上人來喜而

問之 二首

客居久住西湖水水上  
諸峯已若家別後心情長  
欲往夢中光景每多差  
蘇隄小桺成陰未通塚  
枯梅坼枿耶知爾新從  
湖上至故憑問訊莫相  
註昭慶法壇經幾戒淨  
慈禪院若爲叅藕居花  
發何年盛虎跑泉分孰  
處甘多少僧存靈隱寺  
有無人到紫陽菴兩高  
峰頂誰常住擬欲從師  
一一談

山中書情寄孫毅齋學士 二首

田園歲入課蹲鴟手裏  
閒持一釣絲閉戶免教  
明

月旦縱形堪擬號天隨柴門留鎖逢僧至蘿徑彈  
琴候客遲滿腹飲河鯤鼠樂翻思人在鳳凰池  
本無高志謝囂煩拙疾居然近嬾頑將母且堪耕  
負郭聚徒因得訪名山春來道侶看花至日入家  
僮買藥還黃鵠摩天掀羽翮白鷗江上意閒閒

閒居卽事奉懷徐少湖侍郎二首

流泉迴曲樹扶疎頗有人嘲尚白廬傷舍名山看  
不足滿庭芳草懶教除談禪已別根三乘卻疾新  
傳髮百梳當路追攀今念滅何須不作故交書

悠然舒卷片雲孤寬褐偏增四體癯本爲聞鐘驚  
海鳥亦知在木卽山樗閉門自著歌堯問行路人  
猜效舜趨致主唐虞公等在愛潛一谷更名愚

寄張淨峰司馬

兩足將窮五嶽春祇牽男女未成人求田清世宜  
逢笑看竹間鄰每被嗔郡縣猶煩知姓字妻孥稍  
已近甘珍同塵頗惹俗流毀不是高賢豈識真

寄曾前川

斬伐伐來竭壑岸却容大木臥江隈道路過逢徒

駭睨朝昏變怪競睚眦九成何日當營觀百尺通天未起臺但保龍鱗蟠鐵幹輪囷終是萬乘裁

得鄒東郭書

歲月崢嶸何易除相看已是十年餘鹿麋啣草思呼侶鴻鴈衝霜忽得書百遍諷吟開七筓八行珍重比瓊琚魯鷄善伏人爭赴鵠卵深慚我不如

得羅念菴書

欲使行蹤滿四方不知吳越定衡湘樹陰陳禮寧遭伐旅次弦歌有負糧疲曳已非希驥乘殷勤猶費託魚腸未由躡籓追游轍門下將誰最簡狂

寄郭淺齋侍郎

大賢小隱臥山阿海內蒼生其奈何脫躡未應忘世事懸車聊且養天和躍馬場邊看險地輕鷗江上狎晴波鄙夫閒放能高論獨有年來漸覺多

吳雲泉見寄爲携者中路失之

尺素春貽坐閱秋復言中路有沉浮祇應郢客疑燕說不是殷侯懶置郵氣合形骸都已外神交文字亦何留崇山表嶺限閩楚岳水瀟灘空自流

得陳明水書客有談陳明水遭鄉人之侮者

初聞已駭妄相傳談久令人一悵然忠敬空聞行  
貊貉安便猶不在林泉讒譏欲點偏爲濯事變侵  
磨亦試堅始識道心能自勝豈容小腹料高賢

寄吳默泉行部漳州

看君纓紱是柴羈行部瀟然何所爲白雨乍飛休  
吏頃青山每對按人時道心閉閣真如水秋興登  
樓偶得詩恬泊應言無與共幽懷却有野夫知

答劉梅國侍郎見寄劉公大瘦人因以梅

爲詠

豈少閩山梅萬樹不如瘦嶺一枝春風霜郵寄香  
猶昔琴冊伴栖賞更新愛翫何曾離坐立清孤長  
自想丰神胡爲鼎食虛調味徒使餘芳及鄙人

寄江午坡

傳道薊溪肥汝遁經年門外可施羅溷塗置筆將  
成賦巖谷生芝故作歌世事不知流澗水歲華空  
見老庭柯山中蕙帳人長在夜夜應聞鶴淚和

卷之九  
三十一  
答周成山見寄

可嘆當年賢吏部不防讒間失高名危機駭發曾  
誰料抗節獨行已自明棄置堪憐終白首沉淪無  
復念蒼生欲知吾道今何在坐席從教野老爭

寄顧左山

年來漸喜世情微發嘆浮生未有歸鍊石猶知食  
訣誤雕龍偏悔着文非遂令白日難空遣坐恐華  
顛欲就腓愛爾陶然東海上竿無羨據苔磯

寄唐荆川 二首

倏然於世有何心共說丈人似漢陰把釣行臨芳  
芷岸採樵時諷紫芝陰暑時暴麥常忘雨園裏鋤  
蔬不見金四體長勤多鄙事道情寂寞自知深  
銅官山下一溪橫知爾獨多山水情最喜爰題蕉  
葉盛不憂長餓蕨苗榮節垂日月嫌高甚思挾煙  
雲苦瘦生閒倚稿梧應自笑本逃名却近時名

寄留都勳部洪芳洲

秣陵留滯一郎官終日趨曹亦閉關善補凋羸惟  
簡帙勉娛涼踽有江山宦情聊寄鼓琴裏詩句常

刪騎馬間都說林泉宜散逸野人知不似君閒

寄顧洞陽

水遶綠蘿莊似畫釣臺閒着木蘭船琴聲初歇月  
掛樹蓮唱微聞風滿川掩卷看山心不繫題詩示  
客意難傳聞著新文名應美亦知胡老已華顛

寄陸北城

芳草春風處處吹相看數舍起勞思人過戶外常  
盈履士向談間盡解頤且樂青芹香冉冉莫教白  
雪鬢垂垂有文不遇工何益知子良非一卷師

送康盤峰廣西叅議

握符制遠分藩重露冕臨人列郡欽節下州官多  
卉服歲中牧貢有蠻金九疑曉望煙如畫八桂冬  
榮雪滿林銅柱標南猶奉朔漢家雨露本來深

和程郡侯游清源山作 二首

山城春半煙光好爲政風流解眺登盤辟偏尋泉  
畔石攀援每值古時藤名花踐遍香沾吏法偈吟  
成寫與僧誰言朱紱能相繞卽此丹梯已可凌  
使君清興在高樓滿目浮雲向暮收天遠滄溟孤

與出日斜極浦片帆投藤蘿半壁垂依隼鏡吹中  
筵驟起鷗正是心和多暇豫當杯莫惹離鄉愁

九月十五日黃東石招遊北山石室陪西

川郡伯用韻

九日忽然過六日好遊可不惜流光最憐賢主能  
開宴賴有佳賓肯愛狂怪石解衣塵氣淨名山對  
酒野情長便挾登覽窮茲月豈必重陽萸菊芳

和月中卽席之作用韻

望在秋時惟此夕月於勝地更能孤諸山環寂微

生籟大海浮光駭弄珠瞰遠纖毫形色盡憑虛半  
點侵氛無願從太守娛清夜五馬騶人莫遽呼

中秋夕東樓宴集用韻

二首

關山鴈過晴天迥涼氣偏成鼓角哀岑寂欲尋娛  
目處風流相命上樓來井參浸漢金波漾雉堞窺  
湖玉鏡開滿席瑤華依錦綺相看忍負手中杯  
明月中天處處同清輝無似此樓中賓僚盡倚蘭  
將玉烹灸真兼魚與熊爽逼冠衣森浩宵影涵闔  
郭動冲融一聲笛呌光零亂更借燈前舞袖紅

西川郡侯惜別之作用韻

二首

達識如公今謝傳中年作別亦情哀且題藻句寬  
離索莫問萍蹤漫去來老大勲名雙劔在踈狂林  
壑一扉開臨懽預惜逢難再坐覺愁容照綠杯  
題名猶記曲江同世事浮雲一槩中階墀袞袞榮  
軒鶴郡解棲棲老軾熊賦政賸將寬大布達觀坐  
使速淹融有酒莫令杯裏淺無丹能駐臉間紅

奉和方西川公中秋夕與黃東石郡齋對

飲之作用韻

二首

美夜清輝宜妙賞華筵選客有誰同悲秋忽見樓  
過鴈愛月何妨軾畫熊玉鏡掛城看漏永金波倒  
海與天融尊前自墜山如玉不用扶携舞袖紅  
佳期三五仍秋半月色中天自不同舉酒聊將酌  
顧兔當歌寧復羨非熊郡齋下榻綠徐孺客座芳  
尊接孔融皎皎銀盤懸綺席華顏照見兩殷紅

得陳華山書

柴門曲巷跡如何車轍時時碾雀羅蕭疾自宜形  
貌惡匿瑕易使垢疵多已無心想交人事豈有文

章致客過何為汀州賢太守猶題緘贈到雲蘿

送朱鎮山叅知蜀藩

雄藩奄履三分土風物聊將訪蜀都  
旛建新文明鳥隼國談初  
姓記蠶鳧江名濯錦流  
偏麗山比脩肩秀獨孤  
劔閣雙門如外戶  
旬宣彌覺盛王圖

寄錢洞泉以使事在嶺南

輜軒更爲遠遊輕  
原隰光華阻使程  
莫遣衣當犀瘴減  
遙知句向蜃樓城  
閒探仙籍朱明洞  
弔訪圖經趙尉城  
共說交南多寶玉  
飲冰心膽自孤清

贈廖雪溪

聲如金玉出謳吟  
肘見時因手捉衿  
被褐誰知懷裏玉  
揮鋤不顧土中金  
流溪清處宜垂釣  
山月偏來勸獨斟  
榮達紛紛輕老醜  
莫將臺笠愧華簪

送袁莪溪應召

飲冰高節有誰倫  
海郡祥刑自不冤  
折獄片言寧用費  
守官三尺欲何恩  
立身會見登朝早  
好諫還看致主尊  
事業崢嶸闡闡上  
可能有意寄丘樊

贈章心壺名醫

年來多病交遊簡半是名僧半是醫本訪緇流叅  
佛乘忽逢國士話黃岐隔膚見膽神觀異剝腹浣  
腸法術奇獨賴值予未反走此身料得尚堪爲

投贈沈青門 二首

今上好文如漢帝多才似爾正同時賦藏篋裏無  
人達身老江千只自知落鳧椽搥輕貴勢流傳樂  
府悅名姬婁卿唇舌須何掉且向東臯守故籬  
荏苒流光鬢已翁詩名少日滿江東過秦着論才  
何忝入蜀論文命不同劔術徒看塵裏暗筑歌猶

自酒邊雄黃金臺圯時輕士慎莫潛身燕市中

兵會館赴靜泉公招陪南衡涵泉二公夜

宴 二首

誰云州郡有纏牽自是高情接勝筵選地張油宜  
望海建瓶瀉酒勝如川層城未闔娛遙夜列宿初  
希美碧天政務從容能好客一時良牧最稱賢  
高館張筵壓海堧平臨極浦俯濤瀾洪流挹入黃  
金盞清漢孤懸白玉盤席上鳴笳聊起舞風前秉  
燭更留懽振衣漸覺襟裾重忘却蕭蕭霜露寒

艾靜泉督造水艦初成獲縱觀其盛賦此

奉獻兼呈南衡涵泉二公 二首

雄畧颯颯美郡丞英資真稱佐專城坐看整暇臨  
尊俎自有威稜領甲兵海波天清煙不起樓船風  
靜水微平故引簪裾觀控險共知制勝在銷萌  
百尺高桅碧漢間蒙衝樓櫓靜如山真將餘氣凌  
窮髮坐使馳聲愴島蠻濤日吐吞增艦勢千楹閃  
蔽壯軍顏兼資文武人安堵海上孤城晝自閑

寄贈陳汀州覲還治所

聞君新領璽書還車上雙幡似渥丹共理親題天  
語寵借年重慰嶺民懽嵐霏入郭衙常冷木索栖  
庭政自寬最是光輝人所羨爲邦元季兩稱難

詠詹晴溪小隱園

聊買一園成小隱高齋事事愜幽情臨池終日知  
魚樂啓戶侵晨愛鳥聲新筍漸抽勝釣竹垂藤因  
製掛衣桁一塵不起心長靜門外何妨人自行

贈劉雪湖善畫梅

橫揮急掃豈無神巧奪天然了不分清影踈踈渾

欲動幽姿的的迥難群一枝時出臨山水萬樹爭  
看亂雪雲別後相思休驛寄開圖長得對夫君

夏日憶泮池芙蓉柬唐博士

方池蘂葉碧攢文秀出鮮紅數朶雲綠水含溪相  
映淨微風還度與揚芬幽姿冉冉偏難狎挺立亭  
亭自不群在泮歌遊宜對此誰知寂寞正思君

贈艾靜泉去官

送遠郊門若為心停雲黯黯起層陰讒言熒惑堪  
銷骨宦業崢嶸竟陸沉解印仍留新字犢還家惟

有舊携琴如弦昔嘆路隅置直道難行豈獨今

同吳泉濱遊靈源山紫雲室訪靜上人

千峯高處一峰深未到遙聞鐘磬音徑路漸通難  
進步山門忽覩已生心色空轟轟迎窓岫禪寂嚶

嚶在樹陰願與爾投廬遠社莫憑陶令傲東林

泉濱

先生為縣令棄歸有陶靖節之趣而所居在靈源山下大與柴桑匡廬相類也

宿紫雲室同泉濱

中年頗苦病相侵聊寄繩牀臥碧岑枕席亦是人  
間物寤寐自無世上心孤月中天風不起明星出

海霧初沉此夕携君同一覺更無在昔與如今  
龍南岡久謫不召詩以爲歎

佐爾謫居猶漢吏欲將孫子長官中地幽應隔陽  
光照天遠宜無雨露通聽厭舶齋喧駛市看頻島  
氣起層宮已知直道非今好莫向時人嘆路窮

贈黃少泉書屋

精廬小構北山下三十六峰在眼前松桂翩翩留  
晚色雲煙開歛發春妍鳥聲求友遷喬木魚藻行  
風舞翠漣期爾一經能自致豈將短檠負芳年

題少濱書屋贈金生

何處清暉最悅人若耶溪上鑑湖濱高齋結構氛  
都遠才子風流意自親靜夜琴心山水在芳春調  
興物華新鳳毛會向靈池宿莫戀鷗羣狎渚濱

哭黃應初山人 二首

碧山長在人何處豪氣杯中恍可尋靈鬼應隨遼  
海鶴遺風猶寄廣陵琴同盟猿狖驚多夢舊撫松  
筠怨獨陰佳句卷中時把翫堪嗟已是古人吟  
舉樽酌汝知何用涓滴曾入地下無星象還天仍

是酒姓名着谷定稱愚解醒誓婦留今語藏畫誇  
神守故厨返幾桑扈真長已雙淚空垂楊子朱

鼻詹晴溪疾愈見貽之作

抱疴忽自長天機四體新除去日非牀上方書閒  
未掩爐間藥火撥猶微着衣始覺腰圍減攬鏡偏  
驚鬢髮稀應笑拘拘今尚爾不如桑扈返於幾

得家兄病後手書

半年尺紙抵千金細認緘題手跡真字裏諄純論  
離別毫端揮灑識精神沉寔起後情思迫憂患經  
餘意氣新誦與兒曹相解曉起居堂上慰慈親

三



Vertical text on the right margin, possibly bleed-through from the reverse side of the page.

